

**EIGHTH LEGISLATIVE ASSEMBLY OF MIZORAM  
(SIXTH SESSION)**

**LIST OF BUSINESS**

FOR FIRST SITTING ON TUESDAY, THE 1<sup>st</sup> SEPTEMBER, 2020  
(Time 10:30 A.M. to 1:00 P.M. and 2:00 P.M. to 4:00 P.M.)

**OBITUARY**

1. **Pu ZORAMTHANGA**, Hon'ble Chief Minister to make obituary references on the demise of the following dignitaries :
  - i) **Pu Pranab Mukherjee**, Former President of India.
  - ii) **Pu F. Sapa**, Former Member of Legislative Assembly.
  - iii) **Pu J. Lawmzuala**, Former Member of Legislative Assembly.
  - iv) **Pu Hiphei**, Former Speaker of Mizoram Legislative Assembly.
  - v) **Pu Rokamlova**, Former Speaker of Mizoram Legislative Assembly.
  - vi) **Pu F. Lawmkima**, Former Member of Legislative Assembly.

**QUESTIONS**

2. **Questions** entered in separate list to be asked and oral answers given.

**PRESENTATION OF REPORT**

3. **The Speaker**, to present to the House the Fifth Report of the Business Advisory Committee for the Current Session.

**ANNOUNCEMENT**

4. **The Speaker**, to announce Panel of Chairmen.

**LAYING OF PAPERS**

5. **Pu TAWNLUIA**, Hon'ble Deputy Chief Minister to lay on the Table of the House a copy of the Twenty Eighth Annual Report 2018-2019 of the Mizoram Public Service Commission.

6. **Dr. R. LALTHANGLIANA**, Minister to lay on the Table of the House a copy each of the following :
- i) The Mizoram (Containment and Prevention of Covid-19) Ordinance, 2020 & The Mizoram (Containment and Prevention of Covid-19 (Amendment) Ordinance, 2020.
  - ii) The Mizoram Epidemic Diseases (Covid-19) Regulations, 2020 & The Mizoram Epidemic Diseases (Covid-19) First Amendment Regulations, 2020.
7. **Pu ROBERT ROMAWIA ROYTE**, Minister to lay on the Table of the House a copy of each of the following :
- i) The Mizoram Responsible Tourism Policy.
  - ii) The Mizoram (Registration of Tourism Trade) Rules, 2020.

**LEGISLATIVE BUSINESS**

*Bill for introduction, consideration and passing*

8. **Dr. R. LALTHANGLIANA**, Minister to beg leave of the House to introduce “The Mizoram (Containment and Prevention of the Spread of Covid-19) Bill, 2020.”

**ALSO**  
**to introduce the Bill**  
**to move that the Bill be taken into consideration**  
**AND**  
**to move that the Bill be passed.**

**H. LALRINAWMA**  
Commissioner & Secretary

.....

**SPEAKER** : Hming tha hi a tha zawk e, hriak to aiin, thihna a tha zawk,pianni aiin.

Thuhritu 7:1.

Mihmingtha tak tak kan ram hruaitute sunna hun kan nei ang a.Vawiinah hian mi paruk lai kan nei a, chungte chu Pu Pranab Mukherjee, India President lo ni tawh leh Pu F.Sapa, MLA lo ni tawh te, Pu J.Lawmzuala, MLA lo ni tawh, Pu Hiphei MLA, Speaker lo ni tawh te, Pu Rokamlova MLA, Speaker lo ni tawh leh Pu F.Lawmkima MLA te an ni a. Kan House Leader zahawmtak Pu Zoramthanga sunna hun hmang turin i lo sawm ang u.

**Pu ZORAMTHANGA, CHIEF MINISTER** : Pu Speaker, vawiinah thil tih chakawmlo tak, mahse ti loh theih si loh kan Legislators, Minister leh kan ram President lo ni tawh te mi paruk lai sunna hun kan nei dawn a ni a, a hmasa berin kan India ram President, Pu Pranab Mukherjee chanchin ka sawi hmasa ber ang a.

Ani hi nimin mai 31<sup>st</sup>August, 2020-ah khan kum 84 mi niin Army Research and Referral Hospital New Delhi-ah a boral a. Bual inah a tluk vanga a thluaka thisen khar tlingzai ngai ah admit a ni a. Ni 1, August, 2020 khan covid positive a ni tih hriat a nih leh a.Ni 13 August, 2020 khan nikhaw hrelo (deep coma) in, ni 19 August, 2020 khan a chuapah natna dang a kai tih hriat a ni leh a, doctor ten theih tawp an chhuah a, chuti chung chuan an chhan zo ta lo a ni.

Pu Pranab Mukherjee hi Pu Kamada Kinkar Mukherjee leh Pi Rajlakshmi Mukherjee te inkarah December ni 11, 1935-ah Mirati khua, khatih laia Bengal Presidency, British India-a lo piang a ni.Pi Suvra Mukherjee nen inneiin fapa pa 2 leh fanu 1 an nei a, a nupui hian kum 2015 khan a lo boral san tawh nghe nghe a ni.

Zirna lamah chuan University of Calcutta atangin MA(History leh Political Science) bakah LLB degree a nei a ni.Upper Division Clerk (UDC) angin Deputy Accountant General (Post&General) Office, Calcutta-ah a thawk a. Chumi hnuah Vidyanagar College, Kolkata-ah Political Science Department-ah Assistant Professor hna a thawk leh a. Politics-a luh hma in Desher Dak (Call of Motherland) ah journalist hna a lo thawk tawh a ni.

Pu Pranab Mukherjee politics zinkawng hi kum 1969-ah a intan a. Indian National Congress zawmin kum 1969, July thlaah khan Rajya Sabha member atan thlan tlin a ni a. Kum 1975,1981,1993 leh 1999-ah te hian thlan nawn a ni bawk a ni. Kum 1979-ah Rajya Sabha a Indian National Congress (INC) Deputy Leader-a ruat a ni a, kum 1980-ah House Leader-a ruat a ni zui a ni. Kum 1982-1984 ah Union Finance Minister atan ruat a ni a,a hmalakna chhinchhiahtlak tak tak a tam hle.

Indian National Congress (INC) buaina avangin kum 1986 ah Rastriya Samajwadi Congress (RSC) a din a. Kum 3 hnuah inremna siamin INC nen an inzawm leh a. Kum 1991-ah Indian Planning Commission-ah Dy.Chairman atan ruat a ni a. 1995-1996-ah External Affairs Minister atan ruat a ni leh bawk. Kum 1998-1999-ah All India Congress Committee-a General Secretary ni turin thlan a ni a. 1985-ah West Bengal Congress President atan ruat a ni a. He dinhmun hi kum 2000-ah luah nawn lehin kum 2010 thlengin a chelh zui a ni.

Kum 2004-ah Jangipur constituency, West Bengal atangin Lok Sabha member atan thlan tlin a ni a. Lok Sabha Leader nihna a chelh zui bawk a. Kum 2004-2006-ah Defence Minister a ni a. Kum 2006-2009-ah External Affairs Minister ni lehin kum 2009-2012 chhung Finance Minister a ni leh a ni. Kum 2012-2017 chhung khan India ram President a ni a. President atana thlan a nih hnu hian active politics atangin a chawl zui ta a ni.

Indian Statistical Institute, Calcutta-ah te, Rabindra Bharati University te, Planning Board of Asiatic Society leh hmun dang dangah Chairman leh President a ni a. Kum 2008-ah Padma Vibhusan a dawng a. Kum 2019 khan India rama civil mite chawimawina sang Bharat Ratna hlan a ni bawk a ni. Heng bakah hian foreign ram leh University hrang hrang atang tein chawimawina tam tak a dawng bawk a ni. Hei hi kan President hlui Pu Pranab Mukherjee chanchin a ni a. A uihawm tak zetin ka hria a ni.

A dawt leha kan sun tur chu Pu F.Sapa a ni a. Pu F. Sapa, Ex-MLA hi March ni 7, 2020 (Inrinni) tlai lam dar 6:15 khan an chenna in Lunglei ah kum 82 mi niin a boral a ni.

Pu F.Sapa hi Pu Kaithiauva leh Pi Chawngthangpuii te fa niin November ni 7, 1937-ah North Vanlaphai khuaah a piang a. An unau hi mipa 7 leh hmeichhia 3 an ni. Pu F.Sapa hian fapa 2 leh fanu 2 a nei.

Zirna lamah pawl 8 a pass a, lehkha zir sang lo mahsela pianpui BA nei kan tih ang chi hi niin eizawna lamah Class I Contractor a ni.

Kum 1960-ah Mizo Union party a zawm a. Chumi hnuah Mizo Union leh Mizoram Pradesh Congress Committee an in merge khan Congress a zawm a. Lunglei District Congress Committee-ah Treasurer leh President nihna te hun eng emaw chen a chelh a ni.

Kum 1989 2<sup>nd</sup> Mizoram State Legislative Assembly general election-ah Congress party ticket in Lunglei South Constituency atangin MLA atan thlan tlin a ni a. A term chhung hian Dy. Govt. Chief Whip a ni a. Hei bakah hian Lunglei District High Power Committee Vice Chairman a lo ni tawh bawk a ni.

Pu F. Sapa hi January ni 8, 2020-ah Christian Hospital, Serkawn ah dah a ni a. Hetah hian dialysis vawi 10 lai tih a ni a. In lama inenkawl turin damdawi in an chhuahsan a. A tha chho ve zel tura an beisei laiin March ni 7, 2020 (Inrinni) tlai dar 6:15 khan chatuan ram min lo pan san ta a ni.

A dawt leha kan sun tur chu Pu J.Lawmzuala a ni a. Pu J.Lawmzuala, Ex-MLA hi March ni 30, 2020 (Thawhtanni) zing dar 7:30 khan Civil Hospital, Lunglei ah kum 75 mi niin a boral.

Pu J.Lawmzawla hi Pu J.Buana leh Pi Thansseii te fa niin October ni 11, 1944-ah Lunglei Serkawn ah a piang a. An unau hi 8 niin amah chauh hi mipa a ni. Pi Lalkungpuii nen 1970-ah an innei a, fapa 2 leh fanu 2 a nei a, tu 7 a nei bawka a ni.

Zirna lamah chuan High School thleng chu Mizoramah a zir a. B.Com hi St. Anthony's College, Shillong atangin a pass a ni.

Politic hi kum 1994 atangin a luh chilh a. Kum 1994 4<sup>th</sup> Mizoram State Legislative Assembly general election-ah Mizoram People's Conference party (MPC) ticket-in Lunglei South Constituency atangin MLA atan thlan tlin a ni a. A term chhung hian KVI Board Chairman a ni.

Pu J.Lawmzuala hi March ni 15, 2020-ah khawsik leh awmna avangin Civil Hospital, Lunglei ah a awm a. Doctor leh Nurse ten theihtawp chhuaha an enkawl laiin March ni 30, 2020 zing dar 7:30-ah chatuan ram min pan san ta a ni.

A dawt leha kan sun tur chu Pu Hipheia a ni a. Pu Hiphei, Ex-Speaker hi April ni 8, 2020 (Nilaini) zing dar 7:30 khan Aizawl Civil Hospital-ah kum 82 mi niin a boral.

Pu Hiphei hi Pu Zatia leh Pi Rochei te fapa niin August ni 23, 1937-ah Chapi khuaah a piang a. Kum 1961-ah Pi Sathlie nen an innei a. Fapa 3 leh fanu 2 a nei a.

Pu Hiphei hian zirna chu an khua Chapi-ah bul a tan a. BA (Eng) Hons. Shillong College-ah a zir laiin politics lamah a zuan luh san ta a ni.

Tokalo M/S leh Chakhei M/S-ah te Headmaster hna a thawk thin a. Kum 1963-ah Lakher Region – Mara Freedom Party (MFP) hi a dintu te zingah telin Vice President atan thlan a ni a. Kum 1963 – 69-ah Pawi-Lakher Region Council member atan thlan tlin a ni bawka.

Mizoram UT a nih laiin Tuipang Constituency atangin MLA atan a zawnin vawi 4 thlan tlin a ni a. Chungte chu 1972 (Independent), 1978 (Independent), 1979 (Janata party), 1984 (Congress party). Kum 1972 hian Dy. Speaker hmasa ber atan thlan a ni. 1979 hian Opposition Dy. Leader a ni

a, opposition tha tak a ni. Kum 1984 hian Minister of State niin Labour & Employment Department Printing & Stationery Department leh Animal Husbandry & Veterinary Department-te a enkawl a ni.

Mizoram state puitling a nih hnuin MLA atan Congress party ticket-in Tuipang Constituency atangin 1987 leh 1989-ah thlan tlin a ni a. Palak Constituency atangin 2013-ah thlan tlin a ni leh bawk a ni. Kum 1989 khan Speaker atan thlan a ni a. Speaker hna a chelh mek lainn July 1990-ah Member of Parliament, Rajya Sabha atan thlan tlin a ni a. Kum 1996 July-ah Rajya Sabha MP atan thlan nawn leh a ni. Kum 2013-2018 chhung hian a tum hnihna atan Speaker, Mizoram Legislative Assembly a ni leh bawk a ni.

Pu Hiphei hi state politics lamah a hmel kan hmuh loh chhungin kum 2012 khan Mara Autonomous District Council-ah MD atan thlan tlin niin MADC Chairman a ni tawh bawk a ni.

Kum 2019 October thlaah stroke natnain a tlakbuak a. Aizawl Civil Hospital ICU-ah te dah a ni a. Guwahati lamah te kal pui lehin hetah pawh hian ICU-ah bawk enkawl a ni a. February 2020-ah Aizawl Civil Hospital-ah uluk taka enkawl a nih mek lainn April ni 8, 2020 zing dar 7:30 khan chatuan ram min pan san ta a ni.

A dawt leha kan sun leh tur chu Pu Rokamlova a ni. Pu Rokamlova, Ex- Speaker hi July ni 1,2020 ( Nilaini) zan dar 7:35 khan Ebenezer Medical Centre, Aizawl ah kum 79 mi niin a boral. Pu Rokamlova hi Pu K.T.Dawla leh Pu Rozingi te fa niin, May ni 30, 1941-ah Dawrpui, Aizawl ah a piang a, an unau hi mipa 3 leh hmeichhe 1 an ni. Pu Lianbuangi nen December ni 16, 1976-ah an innei a, fapa 2 leh fanu 1 an nei.

Zirna lamah chuan Matric thleng chu Aizawl ah a zir a, St.Edmund's College, Shillong atangin B.A a zo va, Guwahati University atangin M.A (History) a zo leh bawk a ni.

Kum 1966-ah Synod College, Shillong-ah lecturer hna a thawk a, 1968-ah Pachhunga Memorial Government College-ah (tuna PUC) lecturer hna a thawk leh a, Vice Principal-ah a kai chho va, Aizawl College-ah Principal hna a thawk thin bawk a. Kum 1981-1983 chhung khan NEHU Mizoram campus-ah Deputy Registrar hna a chelh tawh bawk a ni.

Pu Rokamlova hian January 1984 ah Congress (I) party a zawm a, hemi kum vek hian Fourth Mizoram Legislative Assembly, general election-ah Congress (I) party ticket-in Aizawl East Constituency atangin MLA atan thlan tlin a ni a, Minister niin Education Department; Rural Development Department leh Social Welfare Department te a enkawl a . June ni 30, 1986 zana India leh MNF ten inremna (Peace Accord) an ziahna hmunah pawh a tel ve a ni. Kum 1987, First Mizoram Legislative Assembly General election-ah

Congress (I) party ticket-in Aizawl East Constituency atangin MLA-a thlan tlin leh niin Opposition MLA a ni. Kum 1989, Second Assembly general election-ah Congress (I) party ticket in bial ngai atangin a vawi thum nan thlan tlin leh a ni a, Cabinet Minister niin Transport Department leh Animal Husbandry & Veterinary Department te a enkawl a, July ni 17, 1990 ah Speaker, Mizoram Legislative Assembly atan thlan tlin a ni leh a, term tawp thlengin Speaker nihna a chelh a ni.

Pu Rokamlova hi a upat hnu in natna in a tlakbuak ve reng a, Ebenezer Medical Centre, Aizawl, ICU-ah ni 46 a awm hnuin July ni 1, 2020 ( Nilaini) zan dar 7:35 ah khan a rawngbawl sak thin a Lalpa hnenah min kal san ta a ni.

A dawt leha kan sun leh tur chu Pu F. Lawmkima a ni. Pu F.Lawmkima, Ex-Minister hi July ni 3, 2020 (Zirtawpni) chawhnu dawr 12:10 khan kum 79 mi niin an chenna in Kulikawn ah a boral.

Pu F.Lawmkima hi Pu Banglathanga leh Pi Thangveli te fa niin January ni 21, 1941 khan Thingsat khuaah a piang a. An unau hi mipa 3 leh hmeichhia 6 an ni. Pi K.Zuiliani nen April ni 28, 1965-ah an innei a, fapa 4 leh fanu 1 a nei a.

Zirna lamah chuan Lakhipur, Jowai leh Cherrapunji-ah te lekha a zir thin a. Matric hi Govt. High School, Aizawl atangin a pass a. Industry Office-ah clerk hna thawk chungin I.A leh B.A hi Aizawl College atangin a zo leh a. Kum 1966 ah Guwahati University atangin M.A ( History) a zo leh baw a. Sielmat Christian College, Churachanpur leh Aizawl College evening shit-ah lecturer hnate a thawk thin a. A hna duhawm tak chu bansanin Mizoram politics-ah a zuang lut ta ni.

Kum 1993, Third Mizoram State Legislative Assembly general election-ah Suangpuilawn bial atangin independent ticket-in thlan tlin a ni a, Congress party nen an thawk ho va, Minister of State niin Fisheries Department leh Tourism Department te a enkawl a ni.

Pu F.Lawmkima hi kum 2013 atangin pumpui cancer natnain a tlakbuak a, Kolkattaah te kalpui a ni a, July ni 3, 2020 (Zirtawpni) zingah pawh tha taka tho in chawhnu dar 12:10 khan chatuan ram min pan san ta a ni. Pu Speaker, heng kan mi uihawm tak tak paruk te hi vawiinah kan chan ta a, ram pumin kan chan a, House-in kan chan a, anni hi kan ui takzet a ni tih ka rawn sawi a ni e.

**SPEAKER** : House Leader-in sunna hun a hmang zo ta a, opposition group leader te atangin sawi duh kan awm em? Member zahawm tak Pu Zodintluanga Ralte kan sawm e. Mask kan vuah hi distancing kan ti tha baw a, mahni duh dan ni se, thusawi tur kha chuan mahni rem tih dan ni se.

**Pu ZODINTLUANGA RALTE** : Pu Speaker, vawiinah, helaia member zahawm tak tak lo ni tawh te sunna hun kan nei tur hi a vanduaithlak ka ti hle mai a. 8<sup>th</sup> Legislative Assembly ah hian kan member tam tak te sunna hun kan lo nei tawh a, tunah phei chuan kan Speaker ni tawh pathum leh Dy.Speaker pakhat kan lo sun reng tawh mai a lo ni a. Vawiina kan mi sun tur mi paruk te hi a bik takin keini Legislature party te chuan hun rei tak kan ram kan hnam tan leh kan party tana hnathawk tawh te an lo ni a, kan ui hle a ni ti kha vawiinah ka sawi duh a.

Tin, a bik takin Pu Pu F.Sapa te, Pu J.Lawmzuala te, Pu Hipheia te, Pu Rokamlova leh Pu F.Lawmkima te phei hi chu Pu Speaker, mimal taka politics kan luh tantirha min kaihrutute, party-a kan han awm pawha kan awm dan turte min hrilha min buaiputute an ni a, vawiinah hian Congress Legislative party aiawhin kan ui thu karawn sawi ve a.

Tin, Pu Pranab Mukherjee, India ram politician zingah pawh mi lar ber pawl sunna hun kan han nei tur pawh hi a uiawm ka ti hle a, mimal takin anin hian vawi hnih kan intawng tawh a. A vawi khatnaah chuan MLA kan nih tirha orientation training kan neih tirh khan Pu Speaker, nang leh tuna kan Minister zahawm tak Pu Rintea te nen vawiinah awm chhun kan ni tawh a, helai House ah Pu Praban Mukherjee khan legislators kan nih a kan awmdan tur te leh kan tih tur te kha thiam takin min hrilh a. Khang te kha vawiinah keini hian kan la hmang tangkai em em a. Tin, a vawi hnih lehnaa kan inhmuh leh chu President election a fight tum khan keini Congress MLA te kha Guwahati-ah min ko thla vek a, campaign in arawn ka la, chu chu mimal taka kan inhmuhna a ni a. Vawiinah Pu Speaker, kan mi chhuanawm tak tak he House zahawm takah leh kan ram kan hnam tana thahnemngai taka lo thawktu te hi Congress Legislature party te chuan kan uiin sun an ngai hi pawikan ti takzet a, an kalsan tak an nupui fanau te, an chhungte zawng zawng Pathianin awmpui zel turin duhsakna kan hlan a ni. Ka lawm e.

**SPEAKER** : Leader of opposition group atangin Pu Lalduhoma, member zahawm tak i lo sawm leh ang u.

**Pu LALDUHOMA** : Pu Speaker, vawiinah hruaitu ropui tak tak paruk ngawt a ruala kan han sun hi a vanduaithlak hlein ka hria a, hun te kan hmang rei deuh tawh a, a tawi thei angin ka ti ang a.

Pu Pranab Mukherjee hi Parliament-ah kum li kan lo inhrawn ve a , mi ropui tak a ni a, mi tam takin India ram Prime Minister atana an it a ni a.

**Pu LALDUHOMA** : A chanchin dang chu kan House Leader-in a sawi kha ka ring tawh mai ang a. Tin, midangte pawh hi an bial tan leh kan ram mipuite tana theihtawk lo chhuah a, mite tana lo luangchhuak tawh te an



ni a. Kan ui em em a, a mal te te chuan han sawi dawn ila hun a duh rei dawn a. Kan House Leader sawi kha ka ring leh mai ang a.

Amaherawhchu Pu Rokamlova bik hi tlemte ka han sawi ang a. A ni nen hian politics-ah kan zuanglut rual a, kan intiamrual a ni. Mizoram House atana Delhi-a Teen murti kan hman lai khan zankhat chu kan riak dun a. Kohhran lam thil kan sawi a, kohhran upa thlanah khan vote za ah za a hmu a. 'Engtin nge vote za ah za hi i hmuh theih bik? Nangmah i in vote a ni chiang mai,' ka ti a. Vote e, upa atan hian tha ka inti em a ni a,' ti a. Tirhkoh Paulan mi zirtirtu ni rawh u a tih ang tawngkam hmang ngam ngattu a nihna kha a ropuiin ka hria.

Ka sawi leh duh dang chu Fiji rama harhna a thlen khan Mizoram-ah thleng ve se a ti a, a it em em a. A video kha ama sum seng in nasa takin a vawrh darh a ni. Tichuan ni sawmli tawngtai te an buatsaih a, kan ramah Fiji ram anga harhna a lo thlen a, Pathian hma ah soal thupha chawia a te ber atanga a lian ber thlenga kan kun ve theih a, kan ram kan hnam kan lo dam leh theih hi a duh em em a. A tawngtai nasa em em thin a.

Chutiang mi chu vawiinah kan sun rual hian chulam thinlung te pawh chu kan rilruah min petu ni leh se a tha hlein ka hria a. An zavai hian kan ui em em a, an kalsan tak an chhungkua te Pathian thlamuannain awmpui sela tiin duhsakna ka hlan a ni e. Ka lawm e.

**SPEAKER** : Phar in awm nual mai a. Amaherawhchu hun a kal zel a, Pu R. Lalzirliana, Minister zahawm tak kan sawm ang a. Tin, BJP aiawh kan la leh ang a, Lunglei lam aiawh Pu Lawmawma leh Pu Rokhaw ni se. Pu Zira i lo sawm phawt ang u.

**Pu R. LALZIRLIANA** : Pu Speaker, ka lawm e. Vawiin hi ni hriatreng tur a nih rualin ni lunglenthlak leh ni lungchhiatthlak tak a ni in ka hria a. Pathian leh mipuite khawngaihna avangin helai hmunah hian kum 32 lai a zawnin ka lo awm ve tawh a. Chulaiah chuan hetiang ang ni hi vawikhat mah kan la tawk lovin ka hria a. Tum khata mi uihawm tak tak mi 6 kan ramhruaitu hlui MLA te 5 kan sun hi ka la hre lova, ka hresual a nih loh chuan. Mi hmasate ka han zawt vel thin a, hun dangah pawh an hrelo khawp mai a. Hetiang hi kan tawn zen zen loh a ni. Ni lungchhiatthlak tak mai a ni a, kan rual ute helaia ram leh hnam tana theihtawp lo chhuah tawh ten khawvela an hna chu chawlhsanin chatuan ram an pan a. Chungmite chu helaiah a la awm ten sunna hun kan han nei a ni a.

Tin, vawiin hi hun kan la deuh a nih pawhin Pu Speaker, i hrethiam dawn in ka hria a. Kan sunte hi an tam bawk a. Pu F.Sapa te, Pu Lawmkima te, Pu J.Lawmzuala te ho hi mi tha tak tak an ni a. An chanchin chu kan hre vek tawh a. Pu Lawmkima hi independent-a tling thei te zing ami, mi viak tha

a ni tih hi a chiang hlein ka hria a. Kawm a nuam a, a bula awm hi a hahdamthlak em em a ni. Thil lungngaihna lam hi a ngaihtuah ve vak hian ka hrelo thin a, a bula awm hi a nuam ka ti.

Tin, Pu F.Sapa leh Pu J.Lawmzuala te Mizopa an nihna pawh hi Mizo nun, Mizo society-a inbualfai, inchiahpil an ni a. Tin, mi tha leh mi tluang, mi tih thinrim hreh em em thin an ni. An thawhna apianga tih tak zeta hnathawk thin an ni in ka hria a, an ngaihawm hle a ni.

Pu Rokamlova hi Aizawl East II bialtu a ni thin a, mimal tak pawh hian kan in lamhnai chho viau thin a kan ute avangin.Chutiang chuan kan tan pawh a fel a, a tha thin a ni. Tin, chutiang piahlamah chuan nichina kan ngaihthlak tak ang khan Pathian thuawih a ni a. Kohhran rawngbawltu hi mi thahnemtak an ni a. Upa te pawh kohhran rawngbawltu an awm a, ani chu kohhran rawngbawltu mai ni lovin Pathian rawngbawltu, thlarau lam hmahruaitu a ni a.

Pu Speaker, helaia i thutna hmuna a thutlai khan Assembly Speaker mai a ni lova, chhandamna camping hmun tam takah Speaker atan kohhran te pawhin an rawih thin, thlarau bo tam tak chhandamtu te zingah a tel niin ka hria. Hei hi ka ngaihsanna em em a ni. Ram leh hnam a vei a, ti tak tak lo deuh leh thatchhe chungah ram kaihruai hi a sawisel ber thin a niin ka hria a. Amaherawhchu, a lo chak lo chho ta deuh bawk a, politics hi awm rengna chi ah ngai lovin a chawlhsan chho ta a. Tun hunah hian a khawvel hun chu a lo tawp ta a ni.

Tin, Pu Hipheia hi nichina a hmel a lo lan te khan Pu Speaker, khalai i thutnaa a thutlai te khan dawhsan dawh sak chang te kha a awm thinin ka hria a. A dawhsan loh pawhin a thu pil hmak kan zu hmu thin kha ka mitthla ah a lo lang thin a, a ngaihawm em em a ni. Ani hi MFP-ah khan vice president te pawh ni chho tawh niin Mara ram politics kaihruaitu, an leader ropuiber te zing ami a ni a. Tin, a politics kalkawngah hian Mizo fate zingah chuan ani aia hlawhtling hi an awm lo mai awm mang e aw ka ti a. MRC-ah khan member a lo ni tawh a, MLA a lo ni tawh a, MP tum hnih a ni tawh a, MDC a ni tawh a. Chungah chuan MLA a nih khan Deputy Speaker, Minister of State leh Speaker a ni tawh bawk a. Tin, MDC a nih leh khan MADC-ah Chairman te a va ni leh thei mai a. Chutiang chuan a politics hun hi a hmang tha a, Mizote zingah hian hetiang anga chhiar tur hi kan awm lo mai awm mang e aw ka ti a ni. Chutiang ang mi chu tun hunah hian kan sun a ni a. 1986 remna avang khan Congress party, khatihlaia sorkarna neitute kha downsize a ngaih tak avangin khata remna leh muanna atana chawl te zingah khan a tel nghe nghe a ni. Tuna kan han sawi te, Pranab Mukherjee, India President ropui tak leh politics a khelhnaah pawh hmingchhiatna em em nei lo, mi chungchuanga miten an ngaih a ni thin a. Chutiang chu vawiinah hian kan sun tel bawk ani.

Hang kan sun zawng zawngte hi an chhung te, an kalsan tak te Pathian thlamuannain awmpui se tih hi ka duhsakna a ni. Ka lawm e.

**SPEAKER** : Tunah chuan member zahawm tak BD Chakma kan sawm ang a. A tawi thei ang kha a tha khawp ang, Zawhna leh chhanna kan la nei dawn si a.

**Pu BD. CHAKMA** : Pu Speaker, ka lawm e. Hetiang COVID kara hmai tuam veka kan kal a ngai hi a paw ka ti khawp mai a. Kan dam chhungin hetiang hi a thleng dawn tih kan hre lo a. Chutianga a victim pawimawh ber mai chu Pu Pranab Mukherjee hi a ni a. Hetianga nimin lama a han boral mai hi paw ka ti khawp mai. Engpawh ni se, kar hmasa lamah pawh social media lamah a thi angin a thang tawh a, paw ka ti khawp mai a. Mahse, nimin lamah final report ka dawn hnuah chauh Twitter-ah ka tweet a, condolence hlan turin. Engpawh ni se, Pu Pranab Mukherjee chungchangah hi chuan sawi tur ka nei em em lo va, mi lar tak a ni a. India ram leh khawvel politician lar tak tak pawhin an hriat a ni a. Chuvangin ama chungchangah hi chuan ka sawi tam lo ang a.

Kan Speaker hlui Pu Hiphei chungchangah hian a political age pawh hi ka pian hmaa politics-a lut tawh a ni a. Engpawh ni sela, District Council pathum zingah 2008 atangin kan thawk rual tawh avangin kum 10 ama chungchangah experience ka neih atangin tlem te sawi duh ka nei a. District Council pathumte zingah amah hi hruaitu ber a ni a. Delhi-a a kal dawn pawhin, “Kal rual ang aw,” min ti thin a. Direct funding chungchangah pawh vawi eng emaw zat Delhi-ah pawh kan kal tawh a. Mi taima em em a ni a. Kum lama upa ni tawh mah se hriselna lamah a fimkhur em em a, a inuluk em em a. Speaker Bangalaw-a a awm lai pawhin zing kar hma takah a tho thin a. Chaltlang thlengin kein a kal thin a ni. Chutiang mi chu a ni a. Diet lampangah pawh a invawng a, a nupui sawi danin salt restricted diet rei tak ei tawh a nih avangin a side effect a ni thei ang em aw ka ti a. Kei pawhin vawi khat ka kan a, “Ka pu, engatinge salt engmah hi i ei loh a? Minimum requirement chu a ngai tho a ni a,” ka ti a. Mahse, ‘ka BP a sang alawm’ a ti mai thin a. Chuvangin chi pawh a ei ngam lo a ni. Chuvang chuan salt restricted diet rei tak a ei vanga side effect a ni maithei a.

Engpawh ni se, a damloh laiin GNRC Hospital-ah pawh vawi khat ka tlawh a, ICU-a a awm laiin. Chutah pawh chuan sub-conscious-in a lo awm tawh a. Dam leh mai tura kan beisei laiin hetiang hian kum 2020-ah kan hnenah a lo awm ta lo a. Paw ka ti em em a ni tih ka sawi duh a ni. Eng pawh ni se, Pu Speaker, hun min pek ve avangin ka lawm e. Thank you, Pu Speaker.

**SPEAKER** : Member zahawm tak Pu KT Rokhaw ilo sawm ang.

**Pu KT ROKHAW** : Pu Speaker, hun chep tak karah hun min pek avangin ka lawm khawp mai. Kan hruaitu ropui tak paruk lai vawiinah sun a lo ngai ta mai hi a pawu ka ti takzet a. Tin, kan hruaitute chanchin tlem tlema han sawi lan a that viau laiin hun a chep si a, a bik takin Pu Hiphei chungchang hi tlem han sawi lan ka duh a. Kan hruaitu dangte chu kan Chief Minister khan fiah fai takin a rawn sawi tawh a. A sawi kha ka ring ve mai ang a.

Kan hriat angin Pu Hiphei hi Pu Zate leh Pi Rochi fapa neihchhun a ni a. Zirna lamah hian Lunglei-ah te, Champhai-ah te, Shillong-ah te a lo zir tawh a. Tin, politics-ah hian mipui sawmna avangin 1963-ah khan Mara Convention Zyhno-ah neih a ni a. Chu convention-in a hrin chhuah chu Mara Freedom Party kha a ni a. Tichuan Mara Freedom Party din a nih khan Vice President-ah dah a ni a. Vice President-a dah a nih hun lai kha Pawi-Lakher Regional Council hnuaiia kan awm lai a ni a. District Council dilin theihpatawp an chhuah a. He, District Council kan hmuhnaah pawh hian a sul sutu berte zing ami a ni tih ka sawi duh a.

Kan hriat angin Tuipang bial atangin term sarih MLA a lo ni tawh a, MP hi term hnih a lo ni tawh bawk a, Rajya Sabha-ah. MADC-ah term khat MDC atan thlan tlin a lo ni tawh bawk a. Tin, Mara District Council-ah khan Chairman-a thlan tlin a ni bawk a. Tin, Mizoram State aiawha MP, Rajya Sabha term hnih a nih lai 1990 leh 2002 chhung khan MP a nih chhungin a nihna tlem te han sawi lan ka duh a. khami hun lai khan Congress Parliamentary Party hi a thlana thlan thin a ni a. Khatah khan Executive Member nih a har thin khawp a, Khatah khan Executive Member-a thlan tlin ve ngat a ni a.

Tin, Ministry of Service Transport, Government of India hnuaiiah Consultative Committee member-a ruat a ni a. Tin, Parliamentary Standing Committee on Home Affairs-ah member-a ruat a ni leh bawk a. Tin, Lok Pal Bill, 2001-ah khan Committee Member a ni leh bawk a. Tin Protection from Domestic Violence Bill, 2002-ah khan Committee Member-a thlan a ni leh bawk a ni.

Pu Speaker, kan hriat angin Pu Hiphei hi a tet lai atanga a puitlin thleng, zirna atanga politics a luhchilh thlengin mi huaisen tak a ni tih hi ama nun leh a thiltih leh a hnathawh atanga hmuh theih a ni a. Retheihna leh harsatnaten a hringnunah tlakbuak thin mah sela a hmaa harsatna awmte chu huaisen takin a hmachhawn thin a ni.

Tin, a nuna entawn tlak nia ka hriat thin chu tanpui ngaite tanpui kawngah a inphalna leh a inpeknate hi a ropui em em thinin ka hria a. Tanpui ngai a hriat leh tanpui tura a hnen rawn pan tawh hi chu a tibeidawng duh miah thin lo a. Kha kha a nunah entawn tlak hlein ka hria a. Tin, hruaitu tha

tak a ni a. Pu Hiphei hi hruaitu nihna a pianpui emaw tih mai tur khawpa hruaitu tha a niin ka hria a. A thawhpuite a thawhpui thiam em em a. Tin, mi dangte tana harsatna siam hi a duh ngai reng reng lo va. Amah kha presence of mind nei tha tak a ni a. Mi tawngkam thiam leh thusawi thiam tak a ni a. Politician nih a tling em em a. Parliamentary Speech a thiam em em a. Mipui rilru hneh leh hmin thei turin thusawi a thiam a. A hun leh hmunte hi a hre em em a ni.

Pu Speaker, vawiinah hian a thiltih ropui em em pakhat han sawi lan ka duh chu remna leh muanna duh em em mi a ni a. Mizoram remna leh muanna a lo awm theihna tur khan Minister seat kha a kian a ni. Kha khan remna leh muanna a duhzia a tilang viauin ka hria a.

Chuvang chuan Pu Speaker, Pu Hiphei kan chan ta hi Zoram mipui tan channa nasa tak a ni bakah District Council-a mipuite tan chuan kan hruaitu ropui tak kan chan a ni. Tin, Marafate tan pheih chuan kan pa kan chan a ni tih kha ka han sawi duh e. Ka lawm e.

**SPEAKER** : Lunglei atangin MLA zahawm tak 2 lai an awm avangin Pu Lawmawma Tochwawng kan sawm leh ang.

**Pu LAWMAWMA TOCHHAWNG** : Pu Speaker, vawiinah mi 5 lai he hmun lo luahlumtute, hruaitu lo ni tawh thinte bakah India ram hruaitu ropui Pu Pranab-a te sunna hun he House zahawm takin kan han nei hi a hrehawm hle mai a. Anni zing ami 2 hi kan ngaihthlak tak ang khan Lunglei 'E' kan bial chhung ami an ni a. Midang chanchin sawiloin anni 2 hi ka han thlurbing deuh dawn a ni.

A hmasain Pu F. Sapa hi kan bial Lunglei, Chanmari-a cheng thin a ni a, a dam laia mawhphurhna a lo chelh tawh thinte- Lunglei District Class-I Contractor Association-a President term 4 a lo chelh tawhte, Lunglei District Truck Owner Association-a President leh Vice President a lo ni tawhte, a awmna party Lunglei District Congress Committee-a President term 3 zet leh Treasurer a lo nih tawhna te leh Lunglei 'S' MLA leh Govt. Dy. Chief Whip leh Vice Chairman HPC Lunglei a lo nih tawhnate leh a awmna veng VC-te pawh lo ni a, Vice President hna a lo chelh tawhnate hian zirthiamna lamah sang lua lo mahsela minamai a ni lo tih a puang theiin ka hria a.

Tin, chubakah minaran leh mi zirsang lem lote tan pawh tumruhna leh taimakna nena beih chuan hlawhtlinna kawng hi a awm a ni tih kawhmuhtu tlemte zing ami niin ka hria a. Tin, a miziaa entawntlak em em mai chu a rinawm tlatna hi a ni. Nihna leh hotu nihna duh vang emaw, therhlo ilo um vangin a zuang lawr ve ngai lo a, hruaitu a nih loh lai pawhin nghet tak maiin a thih ni thlengin a awmna party Congress-ah a awm tlat mai hi a fakawmin a

chhuanawm hlein ka hria a. Hetiang rinawmna hi a chhuanawm thlawtin ka hria a ni.

Thil dang pawh tam tak, mimal taka kan inkawmnate pawh sawi tur awm mahse duhtawk rih dawn ila. Vawiinah hian Lunglei 'E' bial leh Lunglei District tan te leh ram hruaitu uiawm tak he House zahawm tak hian kan sun ta chu a ni a, a kalsan tak a chhungte zawng zawng Lalpa Pathianin awmpuiin thlamuan se tih hi kan duhsakna a ni e.

Pu Speaker, Pu J. Lawmzuala, Lunglei lamah chuan Pu J. Vala tiin kan hre lar zawk a, ani hi Lunglei 'E' bial Chanmari Venga cheng bawk a ni. A pa, Pu J. Buanan Padmashri a dawng tawh a, Lunglei ti Lunglei tute zing ami an lo ni tawh a. An chhungkaw rualpawl na leh Lunglei an hmangaihna avanga Lunglei tana ro tling leh chhenfakawm thil tam tak hnutchhiahtu he House zahawm takin kan han sun ta mai hi thil hrehawm tak a ni. Mi taima, nunze dam tak mai a ni a, Pu J. Vala hi a pa hoa an din JB Press leh an store-te chu sumdawmna lama Lunglei tungdingtu hmasa a ni a. An sulhnu tam tak zingah JB cable network leh Govt. JB College-te saw Lunglei mamawh phuhrutu leh thalai zirlai tana inngahna leh chhenfakawm a ni mek reng a ni.

Pu J. Vala hi Lunglei leh a chhehvela mirethei leh chanhaite thlamuantute zing ami niin ama hming tilang duh hauh loin khualkhua a damlo leh mitthite ama sum leh motora vawi duailo lo phur thin tawhtu a ni a. A chenna veng Lunglei-a veng lian berte zing ami Chanmari-ah hian Branch YMA-ah kum 11 chhung zet chu post dang chelh miah lo in Branch Treasurer a ni ngar ngar a, hei hian mi rinawm, depde lo a ni tih a tilang chiangin ka hria a, mi rintlak a nih zia tarlangtu a ni.

Van kohna chhanga amah sun a lo ngai ta hi a lawina kohhran, a chenna veng leh bial, he House tan ngei pawh hian a run thlak ngawtin ka hria. A kalsan a nupui leh chhungkua zawng zawng Pathian in awmpuiin thlamuan se tih hi kan duhsakna a ni e.

**SPEAKER** : Member zahawm tak Pu Vanlalhlanasawm leh ila. Deputy Speaker chair lo la tawh a ni a, a hnuhnung ber i ti tawh mai ang aw, a zahawm em mai.

**Pu VANLALHLANA** : Pu Speaker, min ko tawh dawn lo emaw ka tia ka lawm e. An vaia sawi ka chak viau a, amaherawhchu 2 chauh ka sawi tawh ang a. Pu J. Lawmzuala hi 4<sup>th</sup> Assembly-ah khan member kan ni tlang a, member kan ni tlang ringawt ni loin he laiah hian insi rial in term khat chhung kan thu dun a ni. Chumi avang chuan vawiinah pawh hian ka rilruah a thar viau a ni. Pu J. Lawmzuala hi kan hriat angin Pu J. Buana fapa a ni a, Kolkata atangin B. Com a zo a, sumdawng hlawhtling tak a ni. Miretheite tanpui mi, mi zaidam, nungchang tha, a bula awm nuam em em, naute dawm thiam a ni

a. Kum 5 chhung kan thutdun chhungin a lak atangin engkim, thil tam tak ka zir a ni. Mi tawngkam tam lo, zaidam leh hawihawm tak a ni tih kha ka duhtawh ang a, ka rilru a tharin ka ui em em a ni.

Tin, ka sawi leh duh chu Pranab Mukherjee kha India ram politician zinga ka ngaihsan berte zing ami a ni a, a nickname-ah chuan Pranabda tih emaw Poltuda tih emawa koh thin a ni a. 1969-ah Indira Gandhi-in Congress zawm turin a sawm lut a, nihna chi hrang hrang kum 50 chhungin a nei a, a tawpah India President a lo ni hial a. President ni a UPA candidate a nih khan vote za a 70 chuang a hmu a ni. UPA candidate a ni chung khan NDA lam atang pawhin duhna a dawng nasa khawp mai a, Shiv Sena-te pawh khan an vote hial a, NDA partner an ni a. Shiv Sena-in an in justify dan chuan Congress candidate kan vote lo a, Pranabda hi kan vote a ni an ti ngat a ni.

Tin, a hun laiin thil tam tak a awm a, Nuclear deal chungchangah India-in harsatna a tawk a, External Affairs Minister a nih laiin US-India Nuclear Agreement sign a ni a, khawvel hriatah India ram chu nuclear power nei a ni tih kha sorkar dangte pawmpui khawpin a vawrh sang chho a ni.

Doctorate degree hi University 15 atangin chawimawina a dawng a, foreign University 9 atang leh India University 4 atangin. Tin, a hun laiin Outstanding Parliamentarian a thlan a ni a, mi danglam tak a ni. Chuvangin wawiinah hian ka ui thu ka rawn sawi lang ve duh a ni e. Ka lawm e.

**SPEAKER** : Hun a kal a, Speaker 2 lai mai kan sun dawn a, kan mi zahawm tak takte bakah. Kan President hlui Pranab Mukherjee hi 2008 khan Tuichang bialah min rawn campaign pui ve a helicopter-in. Tichuan motor-in ka lo la a, 'district function-na tur pawisa min pe the,' kan inti a, 2012-2013-ah Health in lawmman kan lak khan aman min lo hlan leh a. Nikum khan Kolkata-ah kan inhmu a, a uiawm hle a ni. Thla kan la dun a, chu chu a hun hnuhnung a ni ta. Kan Speaker-te hi an uiawm zual ka ti a, Speaker ka lo nih khan kan Speaker zawng zawng hi ka tlawh ang ka ti a, kan Home Minister zahawm tak Pu Chama pawh hi ka tlawh a, Pu Kenneth-a te, Pu Hiphei te an vaiin ka tlawh a. Dr. H. Thansanga'n min lo kuah chawt mai a, ka nau min lo ti a. Pu Rokamloa nen hun tha kan nei hman lo a, ka lo leng leh dawn nia tiin hun kan in thlah a, an uiawm em em a ni.

Tunah chuan Pu Pranab Mukherjee, India ram President lo ni tawh leh Pu F. Sapa MLA lo ni tawh, Pu J. Lawmzuala MLA lo ni tawh, Pu Hiphei he Speaker hmun lo luah tawh leh Pu Rokamloa he Speaker hmun lo luah tawh leh Pu F. Lawmkima, Minister-te pawh lo ni tawhte hriatrengna leh anmahni sun nan member-te ngawi rengin minute 1 i lo ding ang u. (1 minute silence is observed)

**SPEAKER** : I thu ang u le. Kan sun tak Mizorama kan hruaitu hmasate chung leh khat leh thenrual thate'n TV atang leh helai hmun atangin kan sunna hi an lo chhim ve a ni.

Zawhna leh Chhannaah kan kal ang a, Starred Question No. 1 zawt turin member zahawm tak Pu BD Chakma kan sawm e.

**Pu B.D. CHAKMA** : Pu Speaker, ka lawm e. Food, Civil Supplies & Consumers Affairs Department chhangtu Minister zahawmtak chhana tan, Starred Question No. 1.

Will the Hon. Minister's for Food, Civil Supplies & Consumers Affairs Department be pleased to state –

- a) The Govt. of Mizoram distribute any free ration to needy families under Prime Minister Garib Kalyan Yojana?
- b) If 'yes', how many families got free ration under the said scheme?
- c) For how many months, these families got free rations?
- d) Is there any plan to distribute more?
- e) If 'yes', upto how many months?
- f) If not, why? Pu Speaker, ka lawm e.

**SPEAKER** : Chhang turin a changtu Minister zahawm tak Pu K. Lalrinliana i lo sawm ang.

**Pu. K. LALRINLIANA, MINISTER** : Pu Speaker, ka lawm e. Member zahawmtak Pu BD Chakma zawhna chhana:

- a) Yes.
- b) 1,55,558 families got free ration.
- c) For (four) months (April, May, June and July, 2020).
- d) Yes.
- e) For another 4 (four) months (August, September, October and November, 2020).
- f) N.A. Ka lawm e.

**SPEAKER** : Zawhbelhna zawt turin zawhna neitu member zahawm tak Pu BD Chakma i lo sawm ang.



**Pu B.D. CHAKMA** : Pu Speaker, ka zawhbelhna chu bukna lam a ni a, standard schedule a awm em, a burin nge weighing machine?

**SPEAKER** : Zawhbelhna dang zawt turin member zahawm tak Dr. K. Pachhunga i lo sawm ang.

**DR. K. PACHHUNGA** : Pu Speaker, ka lawm e. Supply chungchangah zawhna ka nei a, a chhuah hman dawn loh avangin ka han chuhhel deuh a, ka zawhna chu –

Covid 19 problem avangin lockdown leh harsatna tam tak karah chawte kan ngehi mai ang em tih kan ngaihtuah laiin buhfai dinhmunah chaw kan la ngehi em lo va. Tun dinhmunah Mizoram hi buhfaiyah eng nge kan dinhmun tih ka han zawt a ni e.

**SPEAKER** : Kan zawhna hun a tawp a, kan chhan tir mai dawm em ni? House ka rawn e. A nih leh a changtu Minister zahawm tak a theih chen chen chhang turin i lo sawm ang u.

**Pu LALRINLIANA, MINISTER** : Pu Speaker, ka lawm e. Zawhna neitu Pu BD Chakma, MLA zahawm takin bukna eng nge an hman thin tih zawhna kha, kan hriat theuh angin Food & Civil Supply Department bukna kan neih ho hi a chhe nual tawh a. Duhtusamah chuan godown lian zual ho-ah te hi chuan weigh bridge hi hmang ila tih hi duhdan a ni a. Amaherawhchu tunah hian weigh bridge hi duhtusama tam kan nei lova, kan neih chhun chu Serchhip ami chauh hi a ni a. Heng godown lian zual Zuangtui godown-ah te hian kan weigh bridge a chhiat avangin a thar kan chah a, chumi chhung chuan weigh bridge ni lo, weighing machine tunah hian kan hmang mek a. Tin, godown hrang hrangah pawh a theih ang angin chutiang ang chi chu kan hmang a, chah tharte kan nei bawk a, lockdown avanga Guwahati-a cham bang te; tin, lo thleng tawh la fit theih loh te kan nei mek a. Tin, retailer-ah hi chuan ePOS machine hman theuh tur kan ti a, la hmang theilote pawh a thenah hi chuan an la awm bawk a.

Tin, member zahawm tak Dr. K. Pachhunga zawhna Covid 19 avanga harsatna kan tawh, buhfai harsa lova kan neih theih nachhan eng nge ti niin ka hria a. Hei hi a lawmawm khawp mai a, Pathian in kan sorkar a kaihruaina avang liau liau niin ka hria a. Pahnihnaah chuan kan Chief Minister-in theihtawpa ngaihtuahna min hmansakna hi a ni tel a ni. Pathian malsawmna kan dawng nasain ka hria a, kan state kan intodelhlo chung pawhin theih ang anga ruahmanna department-in kan siam ang ang te, sum leh pai mamawh ang ang te kan Chief Minister-in min ngaihtuah sak thin a, ‘thlaphang suh u, eiturah na na na chuan theihtawp kan chhuah thin ang’ tiin. Department pawh kan phur tlang a, thawktu department-ah pawh kan tam a. Kan hriat angin, labour atanga drivers, truck owners leh department-a hnathawktu zawng

zawng te, a nihna takah chuan Gandhi Birthday tih te, Good Friday tih te leh Chawlhni ah te kan awlloh chang hi a tam em em a ni. Gas leh buhfai chungchanga harstana kan tawhah te kan department-a thawktute leh carrying contractor-te leh driver nen, labour nen kan ram tan kan tangrual a, theihtawp kan chhuah avangte pawh a ni a. Tun lockdown-ah ngat phei kha chuan kan labour-te, a bikin kan department labour-te piah lamah FCI godown, rail station Bairabi-a kan neih labour te, rail-a buhfai lo thleng loading leh unloading titu te; tin, hetah Tanhril ami te an awmlo duak mai a ni. Chung karah buhfai loading leh unloading ti turin local mi kan han ruai chawp a, chutiang chuan thenkhatin hri kai palh hlau mahse tlawmngaih chhuah tura kan ngenna angin DC-te nen tangrualin kan kal a. Pu Speaker, sawi dawn chuan sawi tur a tam a, heng zawng zawng hi Pathian hruaina kan sorkarin a chang a, kan Chief Minister finna a pe a, kawng hrang hrangah kan beisei phak aia tamin hlawhtlinna kan hmu a. hengah pawh hian malsawmna kan la dawng zel niin kan hria. Chu chu Pu Speaker, ka sawi theih chu ni mai se. Ka lawm e.

**SPEAKER** : Zawnha leh chhanna hun a zo a, report present tur ka nei a. Tuna kan Session hi Business Advisory Committee (BAC) in Dt. 19, August, 2020 khan he programme tur hi kan lo duang a, chu kan report chu House ah ka rawn present e. A copy kha sem ni se.

**SPEAKER** : Kan chang kim em ? A nih tikhan kan rawn present ta a, House in min pawmpui thei em? A lawmawm e. Tichuan tun tuma kan Session-ah hian Panel of Chairmen kan siam a. Hon'ble member Dr. B.D.Chakma te Pu Lalchhuanthanga leh Pu H.Biakzauva te an ni e.

Tunah chuan Laying of Papers-ah kan kal ang a. Pu Tawnluia, Deputy Chief Minister zahawm takin the Twenty Eight Annual Report 2018-2019 of the Mizoram Public Service Commission hi House dawhkanah rawn lay se, i lo sawm ang.

**Pu TAWNLUIA, DEPUTY CHIEF MINISTER** : Pu Speaker, i phalnain the Twenty Eight Annual Report 2018-2019 of the Mizoram Public Service Commission copy House table-ah ka rawn lay e.

**SPEAKER** : A copy khan han sem u la. A copy sem chhungin rem chang kan la ang e. Covid hripui avangin thutna kan in kar hlat lo thei lo a. Mizoram mipuiin an hriat leh an hmuh atan kan duh bawk a ni. Sawi ang khan thusawi turin in hmai tuam kha mahni remchan dan angin hmang mai u la. (Pu Lalduhoma: Pu Speaker, Pathian zarah kan negative vek bawk a. Mask vuah reng te hi a hrisel lo te pawh an ti ve bawk a. Zalen deuh hlek zawk te hian kan awm hi a tha ang em le? Chair atang chuan ka thu lo mai teh ang. Mahni duh danin i kal ang aw ? Tun tum kan Session tur chu a tha ang reng a vanduai a leiah, 'Pu Speaker, helam hi i duhsak, helam' tih a awm lo a, kan

inthut pawlh vek tawh mai a. ‘Van Lal nau ang a tahna kalvari-ah an dang chuang lo e,’ tih kha kan chhim tan em maw ni le? Kan chang kim em ? Kan chankim chuan Dr.R.Lalthangliana, Minister zahawm takin heng –

(i) The Mizoram (Containment and Prevention of Covid 19) Ordinance, 2020 & The Mizoram (Containment and Prevention of Covid 19) (Amendment) Ordinance, 2020. (ii) The Mizoram Epidemic Diseases (Covid 19) Regulations, 2020 & The Mizoram Epidemic Diseases (Covid 19) First Amendment Regulations, 2020 te hi House dawhkanah rawn lay se, i lo sawm ang.

**Dr. R.LALTHANGLIANA, MINISTER** : Pu Speaker, i remtihain Paper pahnih –

- i) The Mizoram (Containment and Prevention of Covid 19) Ordinance, 2020 & The Mizoram (Containment and Prevention of Covid 19) (Amendment) Ordinance, 2020 leh
- ii) The Mizoram Epidemic Diseases (Covid 19) Regulations, 2020 & The Mizoram Epidemic Diseases (Covid 19) First Amendment Regulations, 2020 hi he House-ah ka lay e.

**SPEAKER** : A copy kha han sem u la. Kan chan kim chuan a pthumna Pu Robert Romawia Royte, Minister zahawm takin heng :

- i) The Mizoram Responsible Tourism Policy leh
- ii) The Mizoram (Registration of Tourism Trade) Rules, 2020 te hi House dawhkanah rawn lay se, i lo sawm ang leh ang u.

**Pu ROBERT ROMAWIA ROYTE, MINISTER** : Pu Speaker, i phalnain he House zahawm takah hian ‘The Mizoram Responsible Tourism Policy’ leh The Mizoram (Registration of Tourism Trade) Rules, 2020 chu lawm takin ka pharh e.

**SPEAKER** : A copy kha han sem u la. Kan chang kim a nih chuan Legislative Business-ah kan kal ang a. Vawiin hian Government sorkar Bill pakhat sawiho tur kan nei a. Bill copy hi member te hnenah ka sem vek tawh kha a ni a. “The Mizoram (Containment and Prevention of the Spread of Covid 19) Bill, 2020” hi a bill neitu Minister zahawm tak Dr. R. Lalthangliana introduce turin i sawm ang u.

**Dr. R.LALTHANGLIANA, MINISTER** : Pu Speaker, he House zahawm takah hian “The Mizoram (Containment and Prevention of the Spread of Covid 19) Bill, 2020” hi introduce ka dil e.

**SPEAKER** : Introduce a rawn dil a, kan remti em ? Kan remti a, bill neitu Minister zahawm takin tunah rawn introduce se, sawiho turin rawn move nghal se. Minister zahawm tak Dr. R.Lalthangliana kan sawm e.

**Dr. R.LALTHANGLIANA, MINISTER** : Pu Speaker, ka lawm e. He bill lo chhuahna bul pakhat hi tawi te ka sawi duh chu British hunlai daih tawh khan “The Epidemic Diseases Act, 1897” India ram hian kan lo nei tawh a. Amaherawhchu hei hi tun ang dinhmunah chuan a hman theih tawh lo va. Tichuan a lo kal zel a, kan hriat angin Covid 19 in khawvel min tibuai hle a. India ram a tibuai a, India hmarchhak state pawh nasa takin min tibuai a. Mi tam takin nunna an chan a, kan hre vek awm e. Mizoram pawh kawng leh lamah chuan a vannei ber leh a ti tha ber in ni e te pawh min han ti nachungin, nasa takin vawiinah hian kan dinhmun hi kiam lam ai hian chhiat lampang ti zawng hian sawi ta ila, kan dinhmun hi a ni awm e. Positive case tunah hian kan tam ta hle mai a. Nei mang lo khan rei tak kan awm a.

Amaherawhchu tun dinhmunah hian sang chuang hlek covid-19 positive case kan nei a, hei hi kan hre vek awm e. Chumi avang chuan hetia a lo pun chho zel vang hian India sorkar pawh hian hei hi a ngai pawimawh hle mai a. Chuvang chuan tlema dan han lekkawh tula hriatna a nei a, chumi avang chuan he Dan hmang hian Covid-19 vawiina kan buaipui mek hi kan kenkawh a, felfai deuh hleka Dan bawhchhia te an awm a nih pawha a hremna tur ang chi chi hrang hrang kha kan Bill-ah khan in lo chhiar tawhin ka ring a, kha kha kan han kalpui chho ta a.

Kan hriat angin Assembly Session hi kan neih hnunung ber kha (ka hriat sual loh chuan) February thla tawpah kan tan a, March thla tir lamah khan kan han nei kha a ni a, khami leh vawiin inkarah hian session kan nei si lo a, chutih mek lai chuan Covid-19 hian nasa takin Mizoram min tibuai a, khawvel a tibuai a, chuvang chuan vawiinah hian hmanhmawh takin, loh theih loh in sorkar kan che lo thei lo a. Ordinance-a kalpui ngaiin, emergency thil tak tak pandemic a lo ni nen hian thui tak kan han kal chho ta a. Tichuan May thla, ni 3-ah khan he The Mizoram Containment and Prevention of Covid- 19 Ordinance,2020 hi kan han kalpui tan ta a. His Excellency, the Governor approval te dan pangai anga la in kan han kalpui chho a, tichuan he

Amaherawhchu tun dinhmunah hian sang chuang hlek Covid 19 positive case kan nei a, hei hi kan hre vek awm e. Chumi avang chuan hetia a lo pun chho zel vang hian India sorkar pawh hian hei hi a ngai pawimawh hle mai a. Chuvang chuan tlema dan han lekkawh tula hriatna a nei a, chumi avang chuan he Dan hmang hian Covid 19 vawiin a kan buaipui mek hi kan kenkawh a, felfai deuh hleka Dan bawhchhia te an awm a nih pawha a hremna tur ang chi chi hrang hrang kha kan Bill ah khan in lo chhiar tawhin ka ring a, kha kha kan han kalpui chho ta a.

Kan hriat angin Assembly Session hi kan neih hnuhnung ber kha (ka hriat sual loh chuan) February thla tawpah kan tan a, March thla tir lamah khan kan han nei kha a ni a, khami leh vawiin inkarah hian session kan nei si lo a, chutih mek lai chuan Covid-19 hian nasa takin Mizoram min ti buai a, khawvel a tibuai a, chuvang chuan vawiin ni ah hian hmanhmawh takin, loh theih loh in sawrkar kan che lo thei lo a. Ordinance a kalpui ngaiin, emergency thil tak tak pandemic a lo ni nen hian thui tak kan han kal chho ta a. Tichuan May thla, ni 3-ah khan he The Mizoram Containment and Prevention of Covid- 19 Ordinance,2020 hi kan han kalpui tan ta a. His Excellency, the Governor approval te dan pangai anga la in kan han kalpui chho a, tichuan he Bill-ah hian Pu Speaker, Dan kan han lekkawhna tur ang chi thil chi hrang hrang te a awm a. Chapter-II ah hian Offences and Penalties te kan han ti a thil chi hrang hrang kan han ziaak chhuak a. Tin, Penalties kan han ti a, Dan bawhchhetu an lo awm a nih chuan chung ho hremna, an chung a action kan lak theihna tur ang chi te pawh kha tarlan chhoh a ni a. Tin, heng bakah hian chu Dan a lekkawhtu tur chu a tak tak ah phei chuan Health Department lam ni chiah loin, phek number 2-na ah khan Authorised person to impose and collect fines tih te kha tih chhoh a ni a. Tin, thil dang dang kan rawn tarlang baw k a. Chapter-III ah hian records of fine imposed tih te, detention of offender tih te, depositing fines tih te leh thil dang dang kha kan rawn tarlang a, eng pawh ni sel Pu Speaker, he Dan hi kan lo kalpui lo thei lo a, hetiang kan dinhmun hi kan hriat vek a nih avang khan kan kalpui lai mek kha a ni tho a, chuvang chuan member zahawm tak tak ten rem in tih phei chuan sawiho tehchiam loa (kan kalpui lai mek a nih avang hian) min ngaituah saka min pass pui mai te pawh hi ka duh khawp mai a, thil tih tur tam tak awmna karah he thil hi loh theih loh in India ram state tin awmna karah an implement mek, an kalpui mek a ni tih kha ka sawi duh a ni. Chuvang chuan he House hian The Mizoram Containment and Prevention of spread of Covid-19 Bill hi min ngaituah sak turin leh min pass sak tur ka rawn thlen a ni. Ka lawm e.

**SPEAKER** : Minister zahawm takin a Bill putluh chhan te a rawn sawi fiah a. Tin, Ordinance, lo theih loha, a lo kal nachhan a rawn sawi a, sawi ngai awm awm te a rawn sawi fiah baw k a. Sawihona kan nei ang a, member pakhatin minute engzat nge kan inpek ang le, minute 5 kan ti em ni? A nih leh minute 5 inpe ang aw. Tunge sawi hmasa ber ang le? Member zahawm tak Pu B.D.Chakma kan sawm e.

**Pu B.D.CHAKMA** : Pu Speaker ka lawm e. Section-A, phek-5, depositing of fines tih kha – The authorized person shall submit the fines collected under section - 5 to the Deputy Commissioner of the district concerned along with all the records maintained under section 6 on the last working day of every month tih kha fine hi tlemte a nih chuan thla tin district headquarter ah kal in, khang fines kha deposit turin VLTF Chairman emaw

khatiang authorized person te kha an kalna leh hawna man kha tunge chawi ang? ₹ 1000/- deposit ngai ta sela, khitah district DC office ah thingtlang lam atanga kal ngai a nih chuan khang travelling expenditure kha engtin nge an manage theih ang? Khawngaihinh kha kha Pu Speaker, min hrilhfiah thei se. Ka lawm e.

**SPEAKER** : Pu Tawnluia, Deputy Chief Minister zahawm tak i lo sawm ang u.

**Pu TAWNLUIA, DEPUTY CHIEF MINISTER** : Pu Speaker, ka lawm e. Kan tawn ngai hauh loh Covid-19 hripuiin Mizoram pawh minrawn tuam ve a, kan huphurh hle a, amaherawhchu kan Chief Minister kaihruainain sorkarin hemi hrileng laka indanna leh lo inven dan te; tin, a khuahkhirh dan te, theihtawp chhuahin tan la in hma an la a. Department lam atanga thawktu zawng zawng ten thahnem an ngai a, a bikin Health Department-a kan thawktute pheichu an fakawm tak zet a, a hma tawng ah sul an su a. Chutiingin law & order kengkawhtute pawhin theihpatawp an chhuah a, kan ngaihthlak tak ang khan supply lamah te pawh a dama ten hemi hrileng laka kan invennaah hian chaw kan nghei lohna turin theihtawp chhuahin tan an la a, vawiin thlengin he Covid hri leng avanga ei leh barah harsatna nasa lutuk taw lo in kan la kal chhuak thei te hi a lawmawm tak zet zet a. Chung zawng zawng chungah chuan kohhran leh NGO te thlawpna leh thawhpaina ropui tak nidang aia tha kan hmu a. Chutiang mipui te thawh hona leh tanhona tha chuan vawiin hi min thlen niin ka hria a. Chubakah mi hausa leh mi neingung zawk leh mi tlawmngai te leh sorkar hnathawkte pawhin sum leh pai CM relief fund-ah an thawh a. Chu chuan nidanga kan pawisa sen ngailona a senso tam tak ngaihna ah thui tak anrawn phuhru thei te hi a lawmawm ka ti a. Chutih karah chuan Ordinance te pawh khati chawp leh chilh hman nghal tura buatsaih a tul tak avangin khatiang khan kan buatsaih a ni a. Vawiinah hian Department-in hetiang Ordinance loh theih loh a hman a tul avanga kan hman tawh hnu in dan anga session hmasa ah anrawn pulut hi a lawmawm hlein ka hria a. Heng zawng zawng hi ngaihtuah ta ila, kan tawn ngai loh hripui kan tawng thut a, invent dan leh enkawl dan pawh zawn chawp ngai a ni a doctor leh law & order keng kawh tuten Chief Minister zahawm tak kaihruainain theihtawp an chhuah a, vawiin hi kan thleng thei a ni. Chaw nghei lovin nunna chan awm rih lovin he hri vei te pawh an dam chhuak mek a. He hri laka invenna te pawh an dam chhuak mek a. He hri laka invenna tur leh a vei te enkawl dan tur Dan an siam hi tha ka tiin a lawmawm hlein ka hria a. Heng hi vawiinah hian kan zavai hian lungrual takin pass in kan zavai hian he Bill hi thlawp thei ila tih kha Pu Speaker, karawn sawi ve a ni e. Ka lawm e.

**SPEAKER** : Member zahawm tak Pu Vanlalhlana kan sawm e.

**Pu VANLALHLANA** : Pu Speaker, ka lawm e. Hei Dan hi uluk takin ka chhiar a, kan copy te kan hmu hma angreng a. ‘The Mizoram (Containment and Prevention of Covid-19) Ordinance, 2020 & The Mizoram Containment and Prevention of Covid-19 (Amendment) Ordinance, 2020’ hi a copy kan dawng advance viau mai a, a zir te pawh kan zir hman a, a lawmawm ka ti khawp mai.

Amaherawhchu hemi advance copy kan hmuh leh tuna House-a an sem kha a inang lo em maw ni chu aw ka ti a. Chapter-2 ah khan Offences tih kha hemi advance copy-ah hi chuan 16-na thleng a awm a, vawiin a House-a an han pharh ah hian 10-na thleng chauh a awm si a. A point dang hi ka check hman chiah lo va, a danglamna kha thil pawilo a ni nge ni ka hrethiam chiah lo va. Chu chu ka sawi hmasa ni se.

Mizoram hripui kan vei a, kum danga kan tawh ngailoh a ni a. Kan in zirtlang chho a, sorkar pawh a ti tha in ka hria a. Tin, sorkar chang ni lovin Mizo mipui te pawl hrang hrang NGO te, political party, kohhran thlengin kan tangrualin ka hria a. Sorkar pawh kan tawiawm tha narawh e. MLA ang pawhin kan hlawhte pawh kan han pe ve a, MLA Fund nuai 50 kha a hmasa lamah khan Chief Minister Fund atan kan han thawh ve a ni a.

Amaherawhchu, sorkar hian mipui a kaihhruainaah hian kan va inpek leh tanpui kan chak ang hian kan tha hi a chhawr lo deuh em aw ka ti a. State level emaw, District level-ah a ni emaw he Covid 19 beih nan hian mipui kan inlungruual tehreng nen, pawl pawh sawi lovin kan inlungruual a, sorkar pawh kan tawiawm that tehreng nen hian, sorkar hian political party leh legislature party ang pawh hian eng meeting mah a nei reng reng lo mai a. Chulaiah chuan eng rilru nge an put ka hrethiam chiah lova. Puih kan chak em em a, keimahni constituency-ah te kan kal a, kan pawisa neih ang ang te pawhin kan pui a. Chutiang chuan kan hun leh kan tha te kan seng a, tun hi kan thleng a. Pathian khawngaihna zarah tun thlenga nunna chan kan la awmlo te hi a vanneihthlak a.

Tin, CM Relief Fund pawh hi mipui hian thawhlawm hi an thawh thain ka hria a, a hmanna te pawh a tul ang ang te chu kan hre ve zel a. Chief Minister Secretariat atang te pawhin a copy te pawh min thawn ve a, a lawmawm a. Chung atanga han en chuan lockdown te kan han ti a, kut hnathawka eizawng ten hna an thawk thei lo va. Chung ang pawh chu khawtlang ah Local Task Force ten neinung deuh te hnen atanga thawhlawm pek khawm te pawhin kan inchoawmdawl a. Khang kha a harsa khawp mai a. CM Relief Fund te pawh kha khatiang atan te pawh khan LLTF te hnenah pawh hian pek darh hi a tha lawm ni tih ngaihtuahnaah a awm a.

Tin, a test na man hi a to em em mai a, sang bi tak meuh meuh a ni a. Tumah duh vang renga kai kan awm lova, duh vang reng a test pawh kan

awm lo va, tulna in min nan vang te a ni a. Kan CM Relief Fund-a thawhlawm tlingkhawm te pawh hi chhawmdawl na piah lamah test nan te pawh a hman theih lawm ni tih lai kha ngaihtuahnaah a lian em em mai a.

Chuvangin mipui kan tangrual a, eng chen nge min chenchilh dawn kan sawi thei lo va. Sorkar pawhin hma a lakchhoh naah hian mumal deuh hlek zawkin inrawn tlang vekin hma a lak theih lawm ni tih kha ka han sawi zau deuh hlek duh a ni. A Bill ngawr ngawr hi chu a tha a, kan tawiawm em em a ni tih kha ka han sawi tel duh a ni. Ka lawm e.

**SPEAKER** : Member zahawm tak Dr. Vanlalhlana kan sawm e.

**Dr. VANLALHLANA** : Pu Speaker, ka lawm e. Bill kan han hmu a, kan lo chhiar ve a. Thil tam tak a cover thei lova, a rawn tlachawp te pawh kha a awm ve thei a. A act ngau ngau chu ka lut tam vak lo ang a.

Section 3-a ‘authorised persons’ tihah hian force te, a bik takin Local Level Task Force te rilruah a rawn awm a. Keima bialchhung ngeiah pawh ka han kal kual a, kan local task force te leh kan police ten anmahniin mask te an inlei chawp a, a remchan chuan kan han inpe ve nawk nawk bawk a. A chhan chu thuichawp tih hriatreng te an lo hmang ve a, hei hi chu enpui a ngai hlein ka hria a. Sanitizer te pawh an mamawh a, hmaikawr vuah lo lo kha annin an va kalchilh tawh bawk si a, risk sang takah khan an awm a. Hengte hi ngaihtuah a ngai khawpin ka hria.

Tin, Local Level Task Force-ah hian mask, sanitizer, disinfectant te an mamawh hle a. Containment area-ah hian harsatna tawk tam tak an awm a, chung chu ngaihsak an ngai khawp mai.

Ka han sawi deuh hlek duh nachhan chu election lai a ni a, MLA angin hma lak hleihtheih pawh a ni lova. Chuvang chuan sorkar lam atangin tihdan awm thei se tih kha a awm a.

Tin, Offences tih ah khan ka lo chhiar hmaih nge ka hre lova, ka chhiar dik chuan ka hria a. List 16 a awm a, officials ho an tihtur ang ti lo te hremna kha a lang lovin ka hria a, ka lo chhiar kim lo nge ka hre lova. Ka sawi fuh lo a nih chuan min ngaidam ula. Official ho hi bus drivers te thleng pawh hian sawi tel ka duh a. Lockdown lain quarantine centre Ramhlun Venglai biakin thlang daiha dah tur kha, Industry peng ah an chhuk tir a, ke in an chhukthla ngat ngat mai a. Positive lo awm palh ta se kalkawngah thil tam tak thleng thei a ni a. Sawi tur tam tak a awm. Officials ho pawh khan an tihtur an tih tawk loh ah khan penalty te hi a awm ve thei ang em tih te rilruah a rawn lang a. Mipuiten kan chawi tawk tawk a, officials te pawh hian hah viau mahse tih tur an nei ve a ni, an fimkhur ve a ngai a ni tih ka han sawilang a ni. Ka lawm e.



**SPEAKER** : Sawi tur kan la awm em? Member zahawm tak Pu C.Lalsawivunga i lo sawm ang u.

**Pu C.LALSAWIVUNGA** : Pu Speaker, tawite sawi duh lai deuh ka nei ve a. Helai 'Authorised persons to impose and collect fines' tih lai hi ka en a.

Ka sawi duh zawk chu engemaw lai khan police force te khan mask hreng lo kha an rawn vai a, khawlaia mask hrenglo te kha an rawn chawi tir chawt chawt mai a. Mi harsa tak te an ni a thenkhat te phe chu, chawpchilh deuh deuhin an rawn kal a, an duh hun hunah an in man bet a, khatiang khan pawisa chawitir te kha a ni tawh a. He kan Danah hian mumal taka khang ang in enkawlina tur te a lo lang hi a lawmawmin ka hria a.

Tin, leh ka sawi duh dang chu chu Pu Speaker, Chapter-2 Offence and Penalties tih huang chhung ami offence tih lai ah hian number 9-na kha tikhan kan hmu a. 'Failing to comply with any other regulations, guidelines or instructions made by the central or the state government for containment and prevention of the spread of Covid-19 including lockdown guidelines issued by the state government from time to time' tih a ni a. Helai hian pawh hian sawi kual duh deuh lai ka nei a. Hmanniah Assam Rifles ten Vairengte check gate an rawn paltlang thu kan hria a, an rawn paltlang a, inthiamloa inhhira mipui leh sorkar lakah inthlahrun a hnekin Mizo mipuite bakah sorkar pawh hi Assam Rifles-te hian an pawisalo hlein ka hria a. A rilru nat thlakin ka hria a. Nunna anmahni avangin kan lo chan tawh a. Khang rangkachak chungchangah te; tin, khing Zokhawthar hmunahte leh chhim lamah Covid-19 hnuah pawh Assam Rifles avang hian mipuiin harsatna kan tawk a.

Nizan maiyah pawh khan ka bial chhungah AR ram chhungah chuan transformer a chhia a, department-in an siam dawn a, an phal miah lo. Khatiang khan an huangtau hle mai a. Chuvangin he ordinance kan siam lai hian ka rilrua lo awm chu Dan bawhchhetute hremna hi eng angin nge a kal? Khang Assam Rifles-te chungah khan thu maiin nge tawngkamin nge action kan lak a takin tih hi vawiinah hian kan Minister zahawm tak pawh khan min hrilhfiah theih chuan a lawmawm ngawt ang. Min hmusitin ka hria a ni. Tin, Mizoram sorkar tan leh Mizo mipui tan pawh mualphona lian tak a tling a ni. Helai hi thil paw tak niin ka hria a, chung chu Pu Speaker, ka han sawi lang tel duh bawka a ni.

Tin, helai hian sawi tur tam tak hi chu a awm a. Kan zavaiin kan tangrual a, Mizo mipui zawng zawng. Thu kan awih em em a, Covid-19 chungchangah hian he House pawh hian Mizo mipuite chungah hian lawmthu sawina kan neihte pawh hi a tha hial awm mang e ka ti a. Ka thlirna tawi te pakhat lek han sawi ka duh chu Pu Speaker, a nihna takah chuan pa pakhatin maian bai tui tak siam ka duh a ti a, siam a tum a. Maian tui tak bai a tum a ni. Tah chuan a fanu hnenah khan maian bai tur va la rawh a ti a, a fanuin maian

bai tur kha a va sik a. Tichuan in cvhhungah arawn la lut a. A fanu pakhat kha, “Lo hik rawh” a ti leh a. A fanu pakhatin a hik leh a. Tichuan a fanu pakhat kha, “Kha bai kha lo chhuang rawh le, lo vil rawh,” a ti a. A vil tir leh a. Mahse, bai tui tak a tira siam tumtu kha pa ber kha a ni tlat mai a ni. COVID chungchangah pawh hian khatiang deuh kha kan niin ka hria. Chuvangin mipui tanrualna hi an fakawm a. Vawiinah pawh hian lawmthu sawi hial tlak niin ka hria a ni. Pu Speaker, ka lawm e.

**SPEAKER** : Member zahawm tak Dr. Vanlaltanpuia i lo sawm ang.

**Dr. VANLALTANPUIA** : Pu Speaker, ka lawm e. Vawiinah hian The Mizoram (Containment and Prevention of the Spread of Covid-19) Bill, 2020 putluh a ni hi lawmawm ka ti em em a. Hei hi sawi ngei ngei a tulin ka hria a ni. Kan hriat angin he pandemic hian khawvel ram ropui leh ram hniam deuhte pawh min hrut vek a. Tichuan keini pawh Rev. Hruaia, kan imported case kan neih kha March ni 22 vel kha niin ka hria a. Chutatang chuan min rawn chiahpiah ta char char a. Tichuanin kan buai ta em em mai a. Thla reilote chhungin tihian buai takin kan awm a. Tichuan ram mipuite himna tura hetiang putluh a ni hi lawmawm ka ti em em mai a.

Ka ngaihtuah thin a, kan sorkar hi Pathian min pek a ni a. Engatinge Pu Zoramthanga kaihruai sorkarah kher hian hetiang hi a lo thlen aw tihte hi ka phak tawkin ka ngaihtuah mai mai thin a. Kan hriat angin khawvel history-te kan keu chuan ram hruaitute hi eng emaw hun inthlak khirh laiahte pawh hian awmze nei taka ruat hi an lo ni thinin a lang a. Mizoram-in he hun khirh tak kan tawh dawn pawh hian chung lam hian kan CM te, kan Dy. CM te, kan Health Minister-te hun khirh tak takte lo pal tlang tawh, a sur a sa hnuiaia ram lo retheihpui tawhtute hi Pathianin a lo ruat ngei a nih dawn hi tihte ka ngaihtuah a.

Miin min chirhthehnate, mautuai haka thi mai mai tur an tihte anga ram lo hmangaih tawh, lo buaipui tawhtute hi he hun khirh lai hian Pathianin a ruat niin ka hria a. Tichuan, he Bill pawh hi Covid 19 darh zel kara ram mipui himna tur atan containment tha zawk kan neihna tur atana rawn putluh a ni a. Mipui tan a lawmawm hlein ka hria tih hi a hmasain ka han sawi duh a.

Tin, Dan nei tha leh nei tha lo ram hi a inthlau em em a. Kan hriat angin tun pandemic-ah pawh hian khawthlang ramte pawh mahni zalenna ngaipawimawh nia inchhal hote chuan mask an hreng duh lo va, an awm khawmte an thulh chuang lo va, an party an thulh chuang lo va, beach-ah an kal khawm ruih ruih reng a. Chutiang chuan khawvel ram ropui ber kan tih America ramte pawh an buai em em reng a ni a. Chutih lain Australia te, New Zealand te, ram dan nei tha ramte erawh chu an him tha viau a ni tihte pawh a lang a. Chuvang chuan keini ram, kan state-a hetiang putluh a ni hi a

chhuanawm ka ti a. Kan Health Minister pawh leh kan official-te an zavaiin ka fak duh a.

Harsatna kan tawh lai hian an thawk rim em em a. Sunday-ah te meeting chuk chuk te a ngai a. Kan chungkua phei hi chuan zan tin deuh thaw hian an hming lamin kan Minister-te, kan Chief Minister zahawm tak te, kan official zawng zawngte hi kan lo tawngtaipui thin a.

Pathianin min veng a, community transmission, community spread, vantlang zinga darh lote pawh hian kan la awm niin ka hria a. Nimpiniah lawkah khan ICMR lam atang pawhin India rama a titha ber state in ni e tih te pawh kan la dawng zel niin ka hria a, a lawmawm em em a ni. Chumi avang chuan test kit tam zawkte pawh kan rawn thawn dawn tih te, a enna tur khawl ang chi te pawh tun aia tha zawkte pawh min la rawn pek an tum niin ka hria a, lawmawm ka ti em em a.

Tin, nimin lawk khan state dang atangin phone-te pawh ka dawng a, kan in phone nawk nawk a. Mizo chu in civilised em mai a, in disciplined em mai a, in society hi in la in-contain tha hlein kan hria an ti a. Kan hriat ang khan novel, virus thar, thil thar a nih avangin a ziarang kan la hre tam tawk lo va, research a la tam tawk hman lo va. Chuvangin min khawih dan leh a nghawng dan zawng zawngte pawh kan la hre tawk lo va. Chuti chung chunga kan state, kan Ministry-te pawhin he hri min la ven sak thei hi a lawmawm hlein ka hria. Vawiina kan Bill rawn putlul hi a thuphungin, (a kip a kawi chuan kan en vek hman lo va) a tha ka ti em em mai a. Ram mipuite himna tur a ni a. Eng emaw a chungah hian thil fel tawklo deuh te leh han en fel ngai, hemi clause-ah hi chuan la siam leh deuh ni se han tih ang chi te hi chu a la en zel theih a. Chuvang chuan he Bill rawn putlul hi tha ka ti em em mai a. He House zahawm tak hian i pawmpui ngei ang u tiin ka rawn thlawp a ni e. Ka lawm e.

**SPEAKER** : Member zahawm tak Pu Lalrindika Ralte i lo sawm leh ang.

**Pu LALRINDIKA RALTE** : Pu Speaker, ka lawm e. A chung thu lam hi chu a tha thawkhat turah ka ngai a. Thil tha tak pawh a nih ka ring a. Amaherawhchu, a pawimawh zawk erawh chu a kenkawhna lam hi uluk a, Dan tha tak pawh ni se a kenkawhna lam leh chung a kengkawhtute inpekna chuan thui tak he Dan hi a that leh that loh hi a hril turah ka ngai a. Sorkarin theitawp a chhuah a, sorkara hemi a kengkawhtute pawhin sawrkar duhdan anga tha taka an tih ka beisei a ni.

Chutiang a nih chuan Dan tha tak pawh a nih ka ring a, ram leh mipui tan thil tha tak turah ka ngai a ni. Chutihruala Pu Speaker, ka sawi tel duh chu keini ho hi ram leh mipui tana pen chhuak kan ni kan inti a, sorkar pawh ram leh mipui tana ding a ni kan ti a. Amaherawhchu, ram leh mipui tana thil kan

tih hian mahni mimal pawisa emaw mahni party pawisa emaw, hmang ang maia mipuite hnena ‘heng hi kan ti a, chutiang khatiang chuan thehtawp kan chhuah a, ti hian kan ti a’ tia ba thing ang lek leka tawng thin hi hriat a hrehawmin ka hria a.

Sorkar-in mipui tana thil a tih hian mipui pawisa a ni a hman tih hi kan hriat vek mah ni se ka han sawi ve hrim hrim duh a. Party pawisa hmang ang mai a tawng te hi a awm thin a, mipui rilru pawh hetiangah hian a thlep thin a ni tih kan hriat a pawimawhin ka hria. Keini hi mipui tana ding kan ni a, wawinah hian mipui sorkar a ni tuna kan sorkar hrawn mek pawh hi. Chumi chu kan hriat nawn a pawimawhin ka hria a. Mipui tana thil tha kan ti a nih pawh hian chutiang ti tura helaia awm hi kan ni. Sorkar pawh chumi ti tura ding chu a ni tih hi kan hriat nawn a pawimawhin ka hria a ni.

Keini chu kan hnathawh chu in hria a, sorkar kal tawh hnathawh chu in hria a, sorkar mipui tana tha zawk chu tihian in hre mai lo em ni han tih anga, mipui hi kan dah mawl lutuk em aw tihte ka ngaihtuah a. Mipui hian kan hrilh ngai lem lo hian sorkar tha leh tha lo, anmahni hmangaihtu leh tu lo hi an hre khawp mai tih kan hriat a thain ka hria a. (SPEAKER : A Bill-ah a la lut miah lo a nia) Hei hi chu Pu Speaker, hei hi ram leh mipui tan a tirah khan ka sawi a, hei hi ram leh mipui tan a that hle pawh ka ring a. Chulai chu ka han sawi tel zawk duh a. Mipui tana thil kan tih hian kan tih tur reng kan ti a ni tih hi kan hriat a thain ka hria. Mipui hi chuan an tana tha leh tha lo sorkar hi an hre khawp mai tih hi tawite in ka rawn sawi ve duh a ni e. Ka lawm e.

**SPEAKER** : Sawi duh in awm em? Member zahawm tak Dr. ZR. Thiamsanga ka sawm e.

**Dr. ZR. THIAM SANGA** : Pu Speaker, ka lawm e. Nichinah khan ka phar hmasa ber a, mahse tun tum chu i vei lam hi Pu Speaker, i duhsak deuh riau mai a, ding pawh kha an tam a. Pu Speaker, tuna kan Minister zahawm takin a Bill pass tura a rawn thehluh ‘Mizoram Containment and Prevention of the spread of Covid-19 Bill, 2020’ hi a lawmawm hlein ka hria a, tihmakmawh a ni a.

Kan hria a, Covid-19 avangin khawvel ram pum kan buai, India kan buai, Mizoram pawh kan buai a ni. Tunah kan hriat angin India ram hi 3-na kan ni mek a, nitina a pungah hian, a kai tharah hian pakhatna kan han ni chho ta a, nitin 60000 chuang India ram hi kan ni chho ta a. USA-te 30000 vel an ni a, Brazil-te 40000 leh tih an ni a. Brazil hi kan pha tep tawh mai a, tun atanga reiloteah chuan 2-na kan ni chho dawn ni awm in a lang a. A thi-ah pawh India ram hi nikhata thi ah hian tunmaiah hi chuan 818 lai kan ni a, tam ber kan la ni, kan sang chho zel a ni.

Chutih rual chuan Mizoram erawh chu kan state sorkar inbuatsaihna hi a fakawm thlawt a. Kan Chief Minister Pu Zoramthanga hmalakna hemi Covid-19 chungchangah ngat hi chuan fak a phu a, a hun takah the right man, the right person at the right time hi a dik chiahin ka hria. Chutih rual chuan kan Health Minister-te leh Minister dang zawng zawngte, MLA zawng zawngte bakah sorkar official zawng zawngte. Chumi piah lamah chuan Mizoram kan vanneihna em em chu NGO tha tak tak kan nei a, kan thawhhona a tha a. Village Level Task Force, Local Level Task Force-te, chu mai piah lamah chuan kohhran ten thahnemngai takin tawngtaina nen engkim mai phal takin hetiang hian kan zavaiin kan thawk ho a. Hemi rah hi tunah hian Zoram hian kan seng a ni.

Chuvang chuan hetiang hian tangrual lo ila chu kan dinhmun chu khitah a nih tawh a rinawm a ni. Chuvangin India ramah pawh hian state ti tha ber zing ami, tha ber kan ni ang tih ngam a ni. MLA-te pawh kan tang ho a, tute pawh kan tang ho a. Kan Speaker pawh khan hemi atan hian MLA fund-te pawh thawh khawm ang u tiin min han rawn khawm a. Tichuan, kan han thawh khawm laih laih a lungrual takin, amaherawhchu la thawh lo kha kan la awm ta si a engtikahnge kan thawh dawn ka hre lo a, thawh lo kha chu kan la awm a, nakinah kan la thawh turah ka ngai a.

Hemi chungchangah hi chuan Mizoram-ah hian vak chhuak tam pawl berte zing ami ka nih ka ring a, Mizoram district hrang hrang kan han vak chhuak a. VLTF te, LLTF te leh heng lai kan khawpuia kan Quarantine Centre zawng zawngte han kal hian kan sorkar-in hna a thawh dan hi an fak viau a ni. Nichinah khan hand sanitizer neuh neuh emaw te kha chu mamawh zual chu an awm ang a, amaherawhchu hengte pawh hi sorkar hian a theihtawpin a mamawh ang hi chu a puhruk a ni.

Test-na chungchangah pawh dik tak chuan theihtawp kan chhuah a, ICMR-in min lo pek bakah pawh CM Relief-fund atang ten tam tak kan lei a NHM atang te pawhin. Vawiin thleng hian Mizoram hi harsatna tawh lo in kan han awm thei te hi kan CM-in he Covid do nana hma a lak nasat zia hi chu a chiang mai a. Tichuan, sum a tam te pawh kan han ti a, amaherawhchu a hmanna hi kan chian a ngai khawp mai. Dik tak chuan a test-na man to ziate pawh kan hria RT-PCR phei chu dik tak chuan a process-na te nen phei chuan 7000 chuang a ni a, a to a ni test-na man hi. Chutiang chuan a man hi kan zuk hriat a ngai a. Pawisa-te pawh a ni lo in in hmang tih thuthangte a han awm thin tak naa, amaherawhchu a hmanna zawng zawng hi chiang takin, felfai takin kan hmu thin a. Engmah hi zep leh eng emaw thup hi a awm lo tih hi a chiang khawp mai.

Chuvangin Mizoram mipuite pawh hian hemi Covid- dona na na ah hi chuan kan state sorkar leh ram pum kan thawhrualna hi an hria niin a lang a. Tunah hian kan bei nasa a, amaherawhchu tunah hian Bill kan han putlulh taka

kha a pawimawh em emna chu, khami kha a tak taka kan zuk tih loh chuan tunah pawh hian theihtawp kan lo chhuah chung pawh hian local spread chu a awm tawh a, community spread pawh hi tha taka kan tih chhoh loh hi chuan a hnai hle tawh a ni tunah hian. Amaherawhchu tun anga kan tan chhoh pat erawh chuan he kan ram kan hnam hi Pathian leh kohhrante tawngtaina zarah leh theihtawp kan chhuahna avang hian kan him ang tih pawh hi a rinawm a ni. Chuvang chuan Pu Speaker, tuna Bill rawn putluh tak hi lungrual tak pass mai turin kei pawh in ka rawn thlawp e. Ka lawm e Pu Speaker.

**SPEAKER** : Tunge sawi leh ang? Kan windup tir tawh mai dawn em ni? Member zahawm tak Pu Zothantluanga sawm leh ila.

**Pu ZOTHANTLUANGA** : Pu Speaker, ka lawm e. He Bill vawiina introduce a ni hi lawmawm hlein ka hria a. Tun hma lamah tuman tun ang harsatna hi kan la tawh lo a, tuma hriat lawk loh, tuma thiam lawk loh harsatna kan tawh chhoh chungchangah hian dan leh dun kan nei a, hetiang phuisui zawk kan han nei tur hi lawmawm ka ti a. Dan hi awm lo sela, mi te punish theihna hi awm lo sela hei ai hian kan hri hian min tichhe nasa dawn niin a lang a. Chuvang chuan Dan kan zahna avang te, sorkarin tih tur, tih lo tur a tih te kan zawm that avangin vawiinah hian nasa lo in kan him chho hret hret a, lo pung deuh mahsela keimahni a khua leh tui dik tak, Mizote ni loin state dang atanga lo haw paramilitary force-te driver te, khatiang khan rapid respond force te an tam em em mai a. Tichuan kei mahni, civil mi state chhung ami ah chuan kan darh lo viauin a hriat a. He hri lo len tir atanga sorkar lo inbuatsaihna a tha ka ti em em a. State dangin hma an han lak miah miah a, kan state-in hma kan han la char char te; tin, kan Minister zawng zawng te, kan Chief Minister zawhawm tak ho an tanrualna rah te, anmahniin technical thil zawng zawng te an hre vek bik lo a, mahse mithiam te rawna hma an lakna ah kawng tha tak te an han duang chhuak te; tin, hemi dona kawnga sum leh pai tul ang ang te kan sorkarin a han ruahman zel te hi kan hmasawna, hemi natna a darh chak loh chhan te niin a lang a. Chuvang chuan sorkar chungah hian lawmthu sawi tur a tam hlein ka hria.

He Bill hi a pawimawh hlein ka hria a, ka support a. A mawl ber pawhin mask te kan hria a, glove ti te kan hria a, sanitizer kan hria a, saptawng pawh kan Mizo tawng hman vek tawhin, vawiinah hian he hri hian min chiah hneh a ni a. Chuvang chuan disinfectant te kan ti a, sorkar hmalakna mipui pawhin an thlawp zel a, he Dan a lo awma kan hman that hi chuan hei ai hian kan in khuakhirh thei ang a, a duh duh veng tina kan lockdown mai mai ang chi ah te pawh hian dan leh dun a awmluh chuan kan task force dan leh dun hre lem lo ten an spread deuh nia kan hriata kan in lockdown mai thin te pawh hi a lo reh ang a, thuneitu te kal tlangin hmalak a lo ni tawh ang. A lawmawm hle in ka hria a, he Dan hi ka support a ni e.

**SPEAKER** : Member zahawm tak Pu C. Ngunlianchunga ka sawm e.

**Pu C. NGUNLIANCHUNGA** : Pu Speaker, ka lawm e. Vawiinah “The Mizoram (Containment And Prevention Of The Spread Covid-19) Bill, 2020, kan sawiho a. Kan hriat ang khan, kan hriat ngai loh khawvelin a buaipui a ni a, chumi inenkawlina tur chungchang leh sorkarin Dan a buatsaih hi lawmawm ka ti a. A Dan chungchang thu ah hian la famkim lo te chu awm tur leh, chu lai chu belh ngai a awm ang tih ka ring a, a tul chuan amendment te pawh la siam chhoh zel tur a ngai i la a tha in ka ring a. Chutih rual chuan Covid-19 dona chungchang thu ah sorkar pawhin theihtawp a chhuah a. Nichina member zahawm tak in a sawi ang khan mimal ang pawh in, a sorkar relbawltu te tana tawngtaina te pawh awmhmun atang ten kan lo nei ve thin a. Chutih rual chuan kan Vice Chairman Health Department-a kan dah member zahawm tak Pu Z.R. Thiamsanga’n Covid do nana thawh ve lo angin min rawn ti kha chu a dik lo deuhin ka hria. Kan phak tawkin he thilah hian kan tang theuh a, keini pawhin kan thla khat hlawh cheng singriat teh meuh mai kha he Covid dona atan hian Congress Legislature Party te hian kan pe a. Chu mai piah lamah, nangma hoa rorelnaah khan keini lam kan tel loh avangin, Congress MLA te chuan tha an tih dan angin an hmang ve mai a ni ang ti lam zawng khan bulletin a awmin ka hria a. Ka lo hre sual mai thei a, chu tih rual chuan kan bial ang theuhah te pawh theihtawpin he thil ah hian tan kan lo la ve a. Sorkar ang pawha kan lo tanpui vena te (SPEAKER: Speaker-in a koh khawmnaah khan kan tel ve lo in ti a, in tel lo em ni?) MLA fund koh khawmnaah khan kan tel lo, kan leader kha a awm lo a ni. Tunah kan leader a awm a, duh chuan nakinah la sawi se (SPEAKER: Ngawi rawh aw; thudik sawi a tha a, CLP leader a lo kal a, a vawihnihnaah khan ‘ka zin dawn e’ a ti a. A vawikhatnaah chuan kan rel a ni. A tawk e, chhunzawm rawh le)

Pu Speaker, engpawh ni se, khalai kha chu keini chuan phak ang tawkin kan bial ah te, District-ah te pawh sorkar damdawi in angah pawh ni se District Level Task Force angah te pawh kan MLA fund te pawh kan lo hmang ve a. Tin, chu mai ni lovin NGO ang ten kan bialah khaw tinah ei leh barah an lo harsa ang tiin kan MLA fund te pawh kan lo hmang ve a ni. He thilah hian a tu a te mah kut kuangkuahin kan thu lo a ni tih kan hre theuh a, kan thawhhona a zarah vawiinah hian Pathian venhimna kan chang a, nunna hloh loa kan la awm te hi sorkar tih that em em vang a nih rualin Pathian venhimna, chung lam venhimna zawk a ni tih te pawh hi kan hriat ka duh khawp mai.

Tin, hemi chungchangah hian sorkarin theihtawp a chhuah a, chu tih rual chuan a ral hma tawnga tal ber te chu kan NGO te, kan Local Task Force te an ni tlangpui a ni. Chu mite chuan theihtawp an chhuah kha, sorkarin a tih tur a ti em em tih te pawh a awm maithei a. Chutih rual chuan, kan vaia kan thawhhona, he hripui kan do hona, kan ram tan kan tan tlangin ka hria a. Keini lam kha che ve lo angah min mawh a, he thil ah hian political advantage lak chi ah pawh ka ngai lo kei chuan. Amaherawhchu kan phak tawkin kan

tang ang a, he hri hian mihausa ber, mi chak ber leh mi te ber pawh tumah a zuah lo a ni. Ka rilrua lo lang ve thin chu Israel fate Aigupta ram atanga an chhuah dawn khan lal ber Pharoa in atanga mi rethei ber in thlengin beram no thisen tat lo hrim hrim kha chu a hrut vek a ni. Chuvang chuan he hri hian khawvel a hrut mek a ni a, chu lai karah chuan inti thawk tha bik lutuk leh thenkhat thawk ve inhriat sak lo ang chi a kha chu fuh ber dawn em ni? Kan phak tawkin, kan theih ang tawkin kan bial chhung ami te leh miharsa, he Covid avanga harsatna tawk, ram pawna awm ei tur nei lo ang chi te pawh kan phak tawkin kan lo tanpui ve na chin te pawh a lo awm ve a, a kilh kelhin kan inhriatpui vek lo a ni thei e, kan inhmuhpui vek lo pawh a ni thei e, he thil ah hian kan vaiin kan tang tlang a, chu mi zarah chuan Pathian malsawmna kan dawng tlang a ni tih kha sorkar kaihruaitu te pawh khan min hriat sak se ka duh khawp mai. Sum leh pai lo thawh ve thei te pawhin tawngtaina tal an lo thawh ve a ni, he ram him nan leh he ram dam nan hian tih hi hre tlang ila. He thilah hian inpuhmawh leh tute emaw in dah hniam leh tu te emaw in dah san tumna hi awm lo se, tih ka han sawi ve duh a ni. Pu Speaker, ka lawm e.

**SPEAKER** : Member zahawm tak Pu Lawmawma Toehhong, kan sawm e.

**Pu LAWMAWMA TOCHHAWNG** : Pu Speaker, ka lawm e. Tawi te in han sawi ve zawk ka duh chu vawiina kan Bill chai mek hi thu lawmawm tak a niin ka hria a. Kan Thurin lehkhabuah kha chuan “inkaihhraina tha a awm lohnaah chuan mipui an tla darh thin a. Lal tha in rorelna an chan in mipui an him a”, a ‘him’ tih a ni a. He hri chhiain khawvel pum pui min man a, ram ropui zawk leh sorkar ropui zawk te, a changkang zawk te pawh nitina an thih buaih buaih laiin vawiin ah keini pakhatmah nunna hloh pawh kan la awm lo hi a hlimawm e han tih rual chu ni lo mahse pakhatmah nunna hloh kan la awm lo pawh hi, kan la him rih te pawh hi eng ang roreltu nge kan hrawn mek? Pathianin eng ang roreltu nge min pek tih te pawh a tilang chiangtu a niin ka hria.

Hemi kawngah chuan sorkarin kan ngaihthlak tak anga kan thil tawn ngai loh leh kan hriat ngai loh te, belebut taka rorel thut thut ngai te. Thu tawp siam a tul hunah pawh thu tawp mumal tak, zawm tlak, kan thatna tur atana chenpakawm a han siam zung zung thei te hi thil lawmawm tak niin ka hria a. A hun taka roreltu, chung lam roreltu min pek a ni tih hi a pawm awm riau in ka hre thin a. Lawmthu kan sawi tamna pawh a ni a ni.

Pu Speaker, tuna dan kan chai mek hi a thuphung chuan a chhung thu chiang vek lo mah ila kan hun tawng tawh atanga siam a nih avang te, kan hun tawn mek atanga siam a nih avangin la siam belh zel tur te pawh a awmin ka ring a, a pawmawmin ka hria a. Chuvangin kan zavaia kan pawm mai pawh ka rawt tel duh a.



Tawngkam hnih khat lek ka sawi belh duh chu democracy sorkar hi mipui sorkar, mipui tana mipui siam, mipui nena thawkho tih a ni a. Hemiah hian kan sawi dan tlangpui thenkhatah hian mipui leh sorkar then hrang zawng te, a thawhhona tidarh zawng te, mi rilru leh inpekna tihnual zawng te pawha tawngkam chheh palh awm thei a ni a. Chumi kawngah chuan kan tawng kan fimkhur pawh a tulin ka ring. Ram roreltu tura mipui thlanchhuah kan nihna kawngah hian he thilah phei hi chuan, he hri chhia dona kawngah phei chuan hawh u, mipuiin an tih te, sorkarin a tih te hi kan inpawm tlana, kan inhriat tlan tawn a pawimawh tak zetin ka hria a. Chutiang taka kan thawhho theihna tur atana hetiang Dan rawn duan chhuah a ni ta te hi chu thil lawmawm tak a ni a, hriatreng tlak a ni dawnin ka hria a ni.

Nichinah khan tehkhin thu kan ngaithla a, khalai kha tawi te han sawi belh ve zawk ka duh a. Kan ngaihthlak danah khan a fanu in maian a va sik a, a fanu pakhatin a hik a, pakhatin a chhuang ta a. A pa ber kha engmah ti lo ang mai khan ngaih theihna deuh a awm a. Mahse a pa khan a sawi ve ta a, he maian hi tu tuh nge le, an ti a, a pa. A chi hi tu zawn nge le, a ti a, a pa. A nih leh a lo tiak a tui lo petu kha tunge maw ni le a ti a, a pa. Tunge thlo fai le, a ti a, a pa bawka lo ni a. Tichuan a fanu ten ei a lo hun takah khan thawk ho ila, che ho ila. Kan zavaia chet hona hi kan chungkuain kan ei ang a, hlim takin chawhlui i kil ang u, an ti a ni. Chuvangin a pa in a thawk lo ang lek leka ngaih theiha, engmah ti ve lo anga sawi kha a famkim tawka lo deuhin ka hria a. He hri chhia kan dona kawngah pawh hian sorkarin a tih tur a ti a, mipuiin kan tih tur kan ti a, VLTF te leh department lam leh security force lam pawhin an ti mek zel a ni. Kan tanrual zel chuan kan Pathian zarah kan ngam ngei ang tih hi ka beisei tlat a ni. Chutiang tur chuan he inkaihhraina mumal tak Dan zam lo awm ta hi mumal taka kan zawm tlan theihna turin hawh u, i pawm tlang ang u khai tih ka rawn rawt a ni e. Ka lawm e.

**SPEAKER** : Tunge sawi leh ang le ? Member zahawm tak Pu Zodintluanga Ralte kan sawm e.

**Pu ZODINTLUANGA RALTE** : Pu Speaker, ka lawm e. Kan sorkar hrawn mek hi an vanduai ka ti khawp mai a. Vawiina hetiang Bill han putluh a ngai ta hial hi Pu Speaker, anni hi an sorkar apiang hian harsatna hi kan ramah kan tawka nasa thin a. Kum 1966-ah rambuai kan ni a, kum 20 teh meuh mai tah leh ha thialna hmunah kan awm a. Chutah chuan Congress Party te rawn sorkarin remna leh muanna kan han nei chho a. Reilote chhung Pu Laldenga hoin kum khat leh a chanve vel an rawn sorkar leh zawk a. Chumi chhung pawhin kan rama thil thleng Assam Rifles te nen intibuai in Mizo civil mi tam tak kahhlum an ni a, thisen tam tak a luang a. Chumi hnuah Congress kha kum 10 a rawn sorkar leh a, hahdam takin, buaina nei lovin kan han kal chho leh a ni a. 1998-ah MNF Party bawka an rawn sorkar leh a, an sorkar chhung khan kan hriat lar chu kan ramah in kidnap te, Aizawl khawpui

chhungah hel hmun an siam tih te. Hel ho in kan mipui an kidnap avanga sorkarin a tlanchhuah ngai chi ang te an hun chhunga nasa tak kan hria a.

Tin, ka rawn sawi ang khan an vanduai ka tihna chu khami hun chhung pawh khan kan ramah tam a tla a ni. Josepha buhzem te kan ti a, Baffacos-ah te, hmingchhiatna tam tak an han tawng chho kha a pawl ka ti hle a. Vawiinah pawh sorkar tha a rawn piang a, hun pangngaia kal ve mek tura kan ngaihtuah laiin kan hriat loh, kan duh vang pawh ni lo, khawvelin kan buaipui kan ramah Covid 19 hri a rawn leng chho leh ta hi a vanduaithlak ka ti a. Sorkar tan pawh a luhai thlak hlein ka ring a. Khawvel dang pawhin an hriatthiam loh thil a ni a. Amaherawhchu thla tam tak a awm hnuah Bill kan han pulut a ni a. Heng ang Bill te hi kei ka ngaihdan chuan an hman tan tur an siam zawh khan Special Assembly te ko ila, nikhat thil thuah heng thil pawimawh te hi chu han pass rup rup ila, han hmang char char ila tih hi a ni a. Mahse an hman ang reng tho tunah chuan a tihfaina ti mai ang, formality angin vawiinah hian bill hi a rawn lut chauh a ni a. Kan hripui hmachhawn hi vawiin thlengin kan ramah a pung tual tual mai si a.

Hengah te hian kan sorkar kal dan te hi dukhawp lohna te pawh tam tak chu a awm ve ang. Amaherawhchu kan sawi ang khan vawikhat an tawna a ni a. CM Relief Fund te pawh nasa takin kan thawh a ni. Keimahni ngei pawhin kan thlakhat hlauh kan thawh a. Kan lo sawi fo thin tawh angin khatih hunlai khan sorkarah sum a tam zia te, harsatna a awm loh zia te kan hria a. Amaherawhchu CM Relief Fund hmanna te kan han hre Chiang a. CM Relief Fund a nih chuan Pu Speaker, ka mimal tak leh mi tam takin an ngaihdan a chu CM Relief Fund-ah chuan vawiiina Covid 19 vei te, harsa te, mangang te tanpuina tur atana thawkhawm kha a ni a. Mahse an hmanna kan han en chuan a tam zawk chu Truenat lei nan, khawl lei nan kan hmang ta daih mai a. Hei hi chu a kalphung tur a va ni lo em tih hi ka rawn sawi duh a. Heng khawl kan mamawh te chu sorkarin keimahni sorkar fund atanga kan hman tur, tul anga lei bawrh bawrh tura kan ngaihtuah laiin CM Relief Fund atanga khang khawl lei han ngai te kha a vanduaithlak ka ti a. Tin, kan Danah hian la awm se ka duh chu vawiiina a frontline-a thawk tak tak, a high risk group kan tih ang chi te hi anmahni welfare leh anmahni tana himna ang chi hi tihpun emaw, tih leh hi a tulin ka hria a. Tin, a bik takin Health Worker te kum tam tak contract basisin an thawk a. A bik takin National Health Mission hnuai amite phei chu kum 15/20 dawn thawk te an awm a.

Vawiinah a hmatawng berah tangin, 24 hours deuhthaw te an thawk a ni. Hengte pawh hi Pu Speaker, tun ang kan hun tawn lai ah te pawh hian anmahni te pawh hi sorkar in an hnathawh te hriaa, han regularize dan te pawh hi awm se a thain ka hria. Vawiinah zanah containment area an ti a, Health Worker te bak kal an awmlo a, tlaivar thak thakin hna an thawk a, heng te pawh hi kan Minister zahawm tak hian hemi Bill-ah hian tello pawh

ni sela, anni an hnathawhna ang te hi hriatthiama, an dinhmun te siam that sak hi an phu ngawih ngawihin kan hria a ni.

Pu Speaker, a tawp ber atan chuan kan Minister-in a rawn wind up naah (Speaker : Minute 10 i nei a, minute 5 ila nei a nia, anni kan pek belh loh chuan, opposition leader te kha aw) Pu Speaker, kan Minister zahawm tak hian nakinah wind-up na ah min rawn hrilh thei sela. Vawiiinah hian kan ramah he hripui leng rawn pung zel hi a nawlpui anga kan in test hi a pawimawh hle a ni tih hi mi zawng zawng ngaihda a ni tawh a. Aizawl khawpuiah phei chuan veng tin mai hi kan in lockdown a ni tawh mai a, kan mangang a. Heng ah te hian hmun dangah, state dangah Cachar-ah te phei chuan District pakhat ve mai a ni a, a thlawnin a nawlpui an in test thei a ni. Keini Mizoram-ah hian Cachar District aia population tlem zawk te phei hi chu Pu Speaker, sorkar hian a thlawna test dan hi ngaituah vat se a tulin ka hria a. A test-na tur khawl te hi a chah thlen hleitheih loh hi a buaithlak ka ti a, USA atanga March thla tir vela an chah te hi engzat nge an hman tawh aw, khang te kha min hrilh thei sela. Tin, CM Relief Fund atanga Truenat khawl an lei te kha, an lei tumna leh an sanction na kha rei tawh tak a ni a. Hengte hi vawiiin thlenga la hman theih loh hi kan mamawh tawh si a, sorkar hi engatinge a muan em em mai tih hi Zoram mipuite hian an ngaichang nasa a ni. A chhan chu mi tlawngai Pu Hauva & Sons, Pu Thantluanga ten khawl tha gold standard an tih RTPCR an lei a, kar khat kar hnih chungin ZMC Hospital-ah an hmang thei tlat mai a ni. Mimalin khatianga an tih theih chuan engatinge sorkar a nih vanga vawiiin thlenga hman theih loh a khatiang khawl te kha a la awm? Engatinge harsatna bik em em mai hi, vawiiinah hetiang crisis/harsatna kan tawh tawh hi chuan , a system te pawh hi a tih hmanhmawh theih lawm ni? Sanction kan move dan te, a tul anga Finance atanga kal dan te hi inpawh tawi rup rup a, kan pawisa neih chhun ang ang te hi hman zung zung a, mipuiin kan hman theih tura kan pawisa te leh kan system te pawh hi siam a hun a ni tih kha vawiiinah ka rawn sawi duh a. Tin, hetia sorkar kalphung pangngai anga crisis, tun ang hun hripui kan do chuan Pu Speaker, nichinah member tam tak ten an sawi kan la vannei rih a, nunna kan la chan lo a ni tih hi chu a dik khawp mai, mahse a sang telin positive te kan rawn kai chhoh chuan eng chin nge he hripui hian kan rama a thawh tur hi kan test tam loh vang hian kan hre lo mai mai a ni. Chuvangin kan sorkar pawh hian kan system, kan pawisa hman thin dan ang te, kan sanction kalphung te pawh hi he hripui donaah hian Pu Speaker, kan hman hi a pawimawh ka ti. Khawl leina tur te pawh CM Relief Fund ami te loh theih loh a kan pawh khawm a ngai a ni. Chutih laiin department thenkhat ah chuan tun kum kan financial year-a, kan budget a kungpui, a khawnpui amite an hmang teuh teuh mai si a. A khawnpui ami hmang thei lo, department thenkhat kan plan fund tam tak helaia an tih theih laiin engatinge Health Department ah hian kan plan fund te hi kan hman ve theih loh tih kha ka rawn sawi a ni a. Hun tha min pek avangin ka lawm e.

**SPEAKER** : Opposition group leader Pu Lalduhoma, member zahawm tak i lo sawm ang. Hun kha kan pe tam deuh hlek aw, a pangngai aain.

**Pu LALDUHOMA** : Ka lawm e. Pu Speaker, tukinah khan roreltute Pathian ruat an nih thu kan ngaithla a, Bible ah bawk khan, “A ni tak e, misual te pawh ni thalo atan,” tih kha a inziak ve tho mai a. MNF sorkar hun a lo chhuah apiang maia, ram pum huap hun thalo an tawng thin hi an khawngaihthlak ka ti a, an vanduai ka ti tak zet zet a ni.

Tin, vawiina kan Bill ngaituah mek ah hian hri a darh zel lohna tura hmalak na tur Bill a ni a. Hetah hian a pawimawh ber an ziah hmaihin ka hria a, a pawimawh ber chu thawhhona tha a ni. Kohhran ram kan ni a, kan NGO te kan kohhran te leh kan political party ten hnam pum thil ah hi chuan inlunguala inbeih nan pawh hmang loa, hma kan lak hona tur a ni tak zetin ka hria a. Amaherawhchu a taka kan han kalpui ah hian keini opposition lam te atanga puihna hi chu sum fai chauh kan sorkar hian a mamawh a, a duh a, a bakah hi chuan kan tel ve a remti lo niin ka hria. Hei hian Covid-19 kan dona kawngah hian kan chak tur angin min tichak lova, vawiin kan Bill-ah pawh hian thawhhona tha a pawimawh zia te hi a tel miah lo a ni. RTPCR khawl pakhatmah keimahni ta kan neih loh lai leh kan hawh khawm mai mai lai khan fund atanga lei ka tum a, kar khat chhunga ka chah thlen theih thu kan sorkar hi ka hrilh bawk a, r hi, tul an ti lo a ni Chutihruah chuan mimalin pawisa faia an pek chuan an dawng bawk si a. Tin, kan CLP leader zahawm takin a khawl in a lei a, vawiin thlengin hman duh loh a la ni reng bawk a. Kei chuan ka zawt a, “E a tul lo e” an tih chuan ka lei lo mai a, ani kha chuan a lei tawp mai ni khan a hriat a, mipui thenkhatin an comment danah hi chuan, “A leitu rilru lah dik heklo, a dawngtu rilru lah dik hek lo,” tih hi a ni deuh ber mai a, a mualpho thlak hian ka hria a, heng thil te hi. Tin, local level-ah pawh keimahni bial ngei ah pawh, constituency level-ah pawh state level chu sawi loh, opposition MLA te hian tel vena kan nei miah lo a ni pakhatmah hian. Kan bial chhungah quarantine centre engzat nge awm, khawi khawi nge, mihring engzat nge awm tih pawh a zawhin kan zawt chawp duk duk mai a ni, min dah pawnglang khawp mai! Theih ang tawkin khati chung chung khan kan fund te kan pe a, kan hlawh te kan pe a, vawiin thlengin. opposition hian kan tih tur kan tiin ka hria, kan theih tawpa cooperation kan pe in ka hria. Kan sorkar min chhan dan erawh hi chu a phurawm loh khawp mai, hun kal zel turah pawh phurna min pe lem lo niin ka hria a, hei hi a pawi ka tih thu ka sawi lang duh a. Tanruah a ngai a, hri kan dona tur kut ke pawimawh ber kan hlamchiah niin ka hria a ni.

A dawt lehah chuan Dan leh hrai hi kan nei teuh mai a, Epidemic Disease Act kan nei a, Disaster Management Act kan nei bawk a, a inhrul hle hlawm mai a, a hranpa a Bill han siam hi a tul ngang a niang chu, kan hre pha

ve lo a, a tha ka ti tho a, tul ka ti mai a. Amaherawhchu heng Disaster Management Act te hi 2005-a lo pass tawh, India Constitution a entry 23-na, Concurrent List hnuaia siam a ni a, hemi Act section 6 hnuaiah hian standard operating procedure, SOP an rawn tichhuak a, Home Ministry-in, hemi hnuaiah hian kum 2 thlenga lung in tan theihna te a awm ve sa vek a, khami hnuaiah khan state-in SOP hran central nena inkalh lo in a siam thei leh tho bawk a. Kha khan min daih mai lo em ni aw? a Bill pui pui kan han pulut a, Ordinance hial kan han ti rup rup kha tih te ka rilru ah chuan a awm a, a Dan kan hriat tawh loh vang te pawh a ni mai thei a.

A dik tak chuan tunhnaia Assam Rifles nena kan intihbuainaah pawh khan kan sorkar thlavang hauh hi a tul ve in ka hria a. Tawng ve te pawh hi a tul in ka hria a. Amaherawhchu, kan sorkar khan tihdik loh in nei ve miau mai a, kan ka pawh a chih phah a ni. Home Ministry-in Section-6 Disaster Management hnuaia SOP an issue ah khan Defense Personnel te, Central Armed Forces te a exempt tih kha a Chiang Khawp mai a. Tin, movement of goods and persons kha restrict loh tur tih kha a Chuang Chiang Khawp mai bawk a. Chuti chung chuan keini in permit te kan lo ti a, central guidelines-ah separate permit a ngai lovang tih a lo ni bawk si a. Chuvang chuan central-a kan Home Secretary-in kan Chief Secretary hial lehkha a rawn thawn a, he dan hi in violate a ni tih ngai khawp te khan kan awm ve a. Chuvang chuan helaiah hian thlavang han inhauh tawn pawh duh ila, keimahni lamin tihsual kan lo neih ve deuh hlek thin si bawk avang hian kan huai tur angin kan rawn huaiin kan rawn pui thei lo che u a ni tih ka sawi lang duh bawk a.

Tin, vawiina kan Bill hi Pu Speaker, mipui lam tihtur a ni vek mai a. Mipui hremna tur Bill a ni deuh vek maiin ka hria. “Tirawh, ti suh” tih hlinin a khat a ni. Sorkar lam tihtur hi a awm lo lutuk a, hei hi a paw ka ti a. Dik tak chuan sorkar hian tihtur a ngah zawk mah em aw ka ti. Hmanniah whatsapp-ah ka hmu a, nurse pakhat Mizo nula nurse chu quarantine centre-ah a awm rei lutuk a. Mi thar an lo lut zel a, a chhuak theilo zel a. Ni 24 a awm hnu ah vawi 4 an han test hnuah chuan a lo positive ve ta ngei mai a ni. Kan chhiar theuhin ka ring. Kha kha tu mawh nge? Sorkar mawh a ni lawm ni? Eng angin nge quarantine centre hi a siam, eng angin nge a enkawl tihte kha. Khangte kha a ni lawm ni hri darh lohna atana pawimawh chu!

Tin, Lengpui Airport atangin an lo haw a, ‘fimkhur takin social distance pawh kan rawn keep ve ngar ngar a, bus ah tawt em emin min phur leh si a kan fimkhurna zawng zawng kha a chawkhche vek a, tihte social media-ah hmuh tur a awm a. Ka mangangin hmanniah Chief Secretary ka phone ringawt a, bus in pe belh thei lawm ni, ka ti a ni. Engtingge an tih tak phe chu ka hre lo. Khangah khan he kan Bill-a Chuang si lo, sorkar lam mawhphurhna tur hi a tamin ka hria a.

Tin, SOP te pawh vawiina SOP dinglai naktukah a tawp dawn a, a thar a lo chhuak har thin lutuk. A tawp dawn tep zanah te a lo chhuak a. Sorkarin lockdown a puang leh dawn nge dawn lo mipuiin kan hre lo va. Tichuan, a rawn ni thut a, kan inleikhawm hman lova. Dawr reilote an inhawng a, kan innak luai luai a. Kha khan hri a tidarh a ni lawm ni, sorkar thiamloh a ni lawm ni hengte hi? A hunah hma taka inrinlawk theihna tura inpuahchah lawk theihna tur hian kan SOP te hi chhuah a ni ngai lova.

Motor intlanhhawk te kan han ti a. Thingtlang traffic jam awm miah lohnaah te intlanhhawk kan han ti a, an feh thei lova, kan cancel leh a. Rorel fel tawk chu a har khawp ang ka ring. Chuvangin beih pawh kan rawn bei vak ngai lo.

Amaherawhchu, hengah hian Minister-a lakluh kan niha thu kan tiam kha, chhia leh tha hriatna thianga tak hmanga thleibik nei lova rorel tura kan intiamna te kha vawiinah hian kan hriat a ngaiin ka hria a. Tha takin hna kan thawkho dawn emaw kan tihlain Health Department internal audit a han awm leh phut mai a. Hetiang internal audit, a department-in an initiate ni si lo hi ka hriat vawikhatna a ni a. Hengte hian mi rilru a ti ngaihtha lo a ni.

Tin, VC election te hripui karah sorkarin a han huaihawt a. Distancing ti dawn mah ila thutna kan intawm vek a, kan tatpherh vek a. A result hi engnge a rawn nih dawn vawiinah hian kan la hre lo.

Tin, test na man a han free lo chho a, quarantine centre-a awmna chawei man a free lo chho a. Hripui a lengdarh dawn chauh a, contact spread a awm mek a, communal spread kan hmabak a kan tawng tep tawh lain, pawisa tam tak central atanga a bika a rawn kal chung pawhin test man leh ei man te kan thing a, hengte hi hun lo hlein ka hria, Mi tam tak sum an neih loh avangin an in test loh phah a ni. Quarantine centre ah te hian an luh hreh phah a ni. Heng zawng zawng hian hri a tihdarh phah a ni tih kan hriat a ngai a.

Tin, frontline a duty te insurance chungchangah pawh insurance chu a lo chhuak ngei mai, sorkar hnathawk lo chhungkua tan chuan engmah a lo awm leh si lo va. Kohhran upa pakhat pawh a duty-naah motor atangan a tla a, a thi a ni. Chu chu Chief Secretary hnenah ka thlen a, sorkar hian cheng sing hnih a pe a ni. Chuti chauh chu a ni a. (SPEAKER: Ngaw rawh aw, kan hun a tawp a. Kan chhonzawm ang nge niang? A thusawi a laklawh a? A nih leh chhonzawm se, amaherawhchu a hun a tawp ve hrim hrim tawh a, a sentence laklawh chu zo rawh se aw.) Insurance te pawh hi, “miin chhiat ka lo tawk a nih pawhin ka nupui fanau an ngaihtuahawm loving, kan sorkarin a take care e,” an tih theih chuan he hripui kan donaah hian kan kal thui thei a ni. Mahse engmah thlavang hauhna a awm lo, a dila dilchhuah chawp ngai, nawr chawp ngai a ni bawks si. Khati ringawta kan sorkar hi a kal chuan an hna a chak thei lovang tih hi ka ring a.

Chuvang chuan heng zawng zawngah hian sorkar tihtur lam hi a tam lo hlein ka hria vawiina kan Bill-ah hian. Mipuite tihtur lam a ni a, a tha tho a, kha chu ka thlawp tho e. Ka lawm e.

**SPEAKER** : Kan hun hi hei chawlh a hun a, kan zo mai dawn nge kan chawl ang a kan lut leh ang? Zo law law mai ang maw? A nih tikhan kan sawi nual ta a. Kan House Leader in sawi duh a neiin ka ring a, House Leader zahawm tak Pu Zoramthanga i lo sawm ang.

**Pu ZORAMTHANGA, CHIEF MINISTER** : Pu Speaker, ka lawm e. Vawiina kan bill lak hi ‘The Mizoram (Containment and Prevention of Covid-19) Ordinance, 2020 & The Mizoram Containment and Prevention of Covid-19 (Amendment) Ordinance, 2020’ a ni a.

Tunhmain khawvel ram hrang hrangah British hunah te pawh hripui leng raphlak pui pui te a lo awm a. Chungah chuan kaldan mumal deuhhleka sorkar a kal loh chuan khang hripui lo do nan khan a buaithlak thin avangin chutiang laka hman tur dan te pawh an lo siam thin a. Tin, heng hi awm zen zen lo a nih avangin hripui a reh hnuah chuan hman pawh tullo te a ni a. Amaherawhchu, hriatlohin a rawn thleng thut a, chutah chuan ram tinin kan han ti chawp chuk chuk a, a tha tawk hauh lo va. A changin belh a ngai a, ram a in develop dan azir leh circumstance ang zelin belh ngai te pawh a lo awm a. Chuvangin, chumi atan chuan India ram pawhin tun tum Covid-19 natna lo thlengah kan dan neihsa, tunhma a ram dangin an lo hman thin te, sorkar dangin an hman thin leh an hmanlai mek te en a ngaihtuah chungin heng hi hman thuai a tul a ni e an ti a. Chumi avang chuan a hmasain ordinance-in han ti phawt ila, a remchang hmasaah House-ah kan siam leh ang chu kan ti a. Tichuan, ordinance-in a awmsa kha kan han siam zung zung a, kan han hmang ta a. Tunah erawh chuan House thutkhawm a lo ni leh ta a, House-in pass sak kan lo ngai ta a. Chuvangin kan Health Minister pawhin hemi hi Dan-a siam turin a rawn pulut a. Vawiinah pass turin kan han ngaihtuah ta a ni a. Tlem ka han chhiar ve a, a tlem a, thil harsa vak a awm lo va. Amaherawhchu, member zahawm takte hian in lo notice ve emaw ka hre lo va, tawngkam pakhat, khami Article 3-na, Chapter 1-a 3na, ‘authorised person’ tihah khan, a tawngkam hi keini ang rual chuan, “A va mak angreng ve maw le,” ka ti a. Kan Health Minister ber pawh ka han rawn ngial a. Helaia ‘an authorised person to impose and collect fines’ tihah khan Sub.No. 3-naah khan ‘any police officer not below the rank of Constable’ tih kha, ‘a va mak ve maw le!’ ka ti a. Police officer, Constable aia hniam police officer awm ngaihna a awm si lo va ka ti a. Keima buai buaiin ka buai a.

Tichuan ‘any policer’ tih dawtah ‘/’ awm sela, policer or officer tihna a ni ang a. ‘Not below the rank of Constable’ tih nen chuan a dik tawh deuh lo maw te ka ti a. Mahse, Dan thiam ho khan kha kha a nih dan tur a ni tlat a ni an ti si a. Kan chhiar zawm zel lo thei lo va, ‘any policer officer not below the

rank of Constable' han tih kha chu, keini ang Dan tawngkam hmang ngai lo tan chuan a mak angreng a, 'any police' tih dawtah oblique (/) emaw, or emaw officer tih chuan zui sela, police tu pawh Constable aia hniam lo an ni tur a ni; IV Grade leh eng emaw mai mai ni lovin, Police Constable tal a ni tur a ni tihna angah keini ang rual chuan kan zuk ngai thei ang a ka han ti a. Mahse, a thiam zawkten, "Kha kha a nih dan tur a ni," an ti tlat si a. Kha kha chu le, a nih chuan a thaah ngai ila, a thuhmun reng a. Engpawh ni se, a Dan thu leh thil dang hi chu mithiamten an rawn duan sa a ni a, a tha khawp mai a. Hetianga hripui a lo len takah chuan heng hi tih tur, tih loh turte a ni e. Heng hi thuneihna kengtu turte an ni e. Hetiang hi i bawhchhiat chuan hetiang hian chawi theih a ni tia inkhapna fumfe taka awm loh chuan hripuiin ram min han hrut meuh chuan; kan tawng hi tawngkam mawilo ni suh se la, America ram leh Europe ram hmun tam takah, "Keimahni mimal zalenna alawm" an ti a, mask vuah lovin an awm khawm a. Tuipui kamah leh hmun dangah an bei mup mup mai a. A rah kan hmuh chu an thi teuh teuh mai a ni. Thi teuh teuh khawpin personal freedom kha an ngaipawimawh ti ila tawngkam mawilo a ni lo vang a, a dik tlat bawk si a. Chuvangin sorkarin hetiang hripui dona atan hian Dan pawh fumfe tak, a kengkawhtu tur te, tin, Dan bawhchhia chu chawi pawh chawitir tur a ni tih nena kan han intih hian kan ziaawm chho va. Keini Mizoram phei chu kan sawi ang khan Pathian zarah thi kan la awm lo va, kan vannei tak tak a.

Heng kan Dan neihte hi a tulzia a tarlangin ka hria a. Hei hian vawiina kan Dan han siam tur leh kan Bill pass tura rawtna lo kal pawh hi a pawimawhzia a tilang zualin ka hria a ni.

Pakhatah chuan, a ni em ka hre bik lo va, mingo ho thi percentage hi a tam riau mai a. Mongolian hi tlem chuan kan zia deuh em maw ni tihte hi ka ngaihtuah a, nangni pawh a chhiarkawpin han chhut chhin ula. Kan tawng an huatthu suhah kan thenawm ram Myanmar ram te, khitah Thailand leh ram dang, hnamah pawh chhangchhe ve tak tak, an thih vek vek chuan an va thi nasa dawn em tih turte hi thi an tlem tlat mai a. An medical facilities leh thil dangah a tlahniam hniam an ni si a. America ramte a sing a nuaiin an thi a. Khatiang karah khan lehlamah phei chuan Pathian malsawmna kan dawnna lamte a ni zawk ang e tihte pawh hi ka ngaihtuah thin a. Vawiinah pawh en ila, China chu a lo chhuahna chu a ni ngei mai. Mahse, China-a thi kha kan khum teuh tawh mai a ni. Brazil-ah te, America-te leh hmun dangah te. Tin, Korea kha an han ri deuh hluai na a, a ziaawm, rin ai tak hian kan thi number hi a tlahniam a. Kan thenawm Myanmar-te pawh rin aiin an thi number a tlahniam a. An lawmpuiawm khawpin ka hria. Engpawh ni se, vawiinah chuan kan theihtawpa he hri hi do tura kan tan a va tul em! Dan kan neih theih ang ang hian han siam ila, chu chuan inenkawl ila, heti chung hian a tha tawk lo, fel tawklo a tam em em dawn tih chu kan hria a ni.



Thil dang han sawi leh lawk ila. Tun kan Covid donaah chuan kan sorkar han fak ila. Hotupa ber, a hming tumtute min han fak ve luam thin a, a lawmawm a. Amaherawhchu a thawh tlem ber ka ni a, ka hriatna a tlem em em a. Zawt chawpin kan dap chawp mai mai a, fak tlak pawh kan ni lo tak tak a. Amaherawhchu khang zawng zawng kha kan han dah khawm ta a, sorkarin kan theih ang tawh kan han tihna pawh a fello lai leh tlinglo lai kha in la sawi kim lo zawk a. Kei pawh hian, “Engatinge?” tihna tur hi ka ngah em em mai a. Kei pawh ka han vin ve viau tum hi a tam viau a ni. “Engatinge kan pu ber chu tun tum chu a va vin ve,” min tih tum pawh hi a tam ve khawp mai. Kan sorkar pawh hi kan arkhawthim dai ve a, kan dap chawp a, fello hi a tam a. At kan hmasak a, fin kan hnuhnun a ni chiang lutuk a. Chuvangin, khang kha member zahawm takten hemi in sorkarin in tihdan hi a tha tawh lo in tih hi kan pawm thlap. A bak pawh a la tam a ni, khang lo pawh kha a la awm teuh ang. Tin, chutih laiin sorkarin kan tihfuh laite pawh a awm ve ang, kan tihthatte pawh a tam ang.

Thawktute zawng zawng, Health Department ami kan Minister-te, kan Doctor-te, kan nurse-te leh thawktu zawng zawng an khawngaihthlak, an hah lutuk. Chuvangin khang kha an fakawm a ni. Amaherawhchu anmahni ringawt chuan engmah an ni bik lo. A piah lamah kan vai tan tak meuh meuh a. NGO, kohhran hotu, YMA leh Upa pawl, Hmeichhe lam hmun tin ami; NGO zawng zawng duty-a kan thawh chhuahna te, thuawih em em maia kan han awmte hi a ropui. Miin entawn tlak pawh min ti tak tak a ni.

Home Minister pawhin video conference a neihah leh telephone-a min han biak veah pawh, “Eng nge tun Covid hi nangni state lam?” an han ti tawngkam tha ve a. Chutah pawh chuan, (Pathianin kan tawng min lo ngaidam sela) tawng nuam ve takin, Kan mipui te, kan sorkar te, kan kohhran, kan NGO ho te heng hi cooperation a tha lutuk a. Mizoram chu regimented society a ni a. Kan vaiin, kan local volunteer tak takte hi a thla tel tam ram hnuaiyah, fur khaw chhe karah, pawisa pakhatmah hlawh lovin an duty a ni.” ka ti a. Vairamah ti ve dawn se kar khat pawh hi an duty peih dawn lo reng reng.

Keini chu khatiang kan neihna kha chhuang takin Prime Minister hnenah te, Home Minister hnenah te leh Minister dangte hnenah pawh inbiakna remchang kan neihah ka han sawi a. Anni pawhin an sawi lo thei lo chu a ni, ‘Mizoram chu in dang bik a ni an ti a. Tin, a taka lo langah vawiin thlengin Pathian malsawmna kan dawng a, thi kan la awm lo leh nghal a, hengte hi a vanneihthlak tak takin kan hria.

Engpawh ni se, khulam atanga kan pun dan en in nakin lawkah kum a lo tawp chuan vei hi 5000 rual chu in ni ve mai thei minrawn ti ngawt a, nih loh chu kan han tum chu ania. Vanneihthlak takin tun hnai ni 2/3 te phei chu so thur thur lo in tlem te te, 10 hnuai te, 2/1 lek lek te ni 1-ah an awm changte

a awm lehngal a, a lawmawm tak tak a. Theihtawpin hei hi keep up zel kan phek tum ang a.

Tin, a tul ang zelin hmalak dan turte pawh kan en ang a. Sorkar atanga CM Relief Fund pawh hi sorkar lamin kan CM ho hian en ula a tha lo em ni an ti a. ‘Ngawi teh u, keini thil kan hre si lo a, chuvangin hetah hi chuan a hre hovin ti teh se. Amaherawhchu, kan NGO ho te, kan kohhran ho te, sorkara hnathawk a hre hoin ti sela thil dang development fund han hman vak ang chi a ni lo a, a mamawh ang te tea hman tul anih avangin anni kutah i dah ang,’ kan ti a, tihian an han tichho a. Heng hman danah pawh memberte sawi ang khan, ngawi teh u, heti zawk hi a tha lo maw tih tur pawh a awm teuh ang, khang kha infinchhuah zel ila. Tin, a tak pawhin henga kan thawktute hnenah heti zawng hian kan pawisa pawh hi hmang ila a tha lawm ni ti te pawh khan infinchhuah zel ila a that ka ring a.

Tin, tuna kan hriat loh, nakina tih ngaite pawh a awm ang a, nichina member zahawm tak ten in tih ang khan a in test-na te pawh hi tam leh zuala kan kalpui a tha a. Amaherawhchu, khatah pawh khan kan in test dante pawh hi tlema kan tlin chin tawk deuhin kan kal chhoh zel chu a ngai ang a, amaherawhchu, a tul a nih phawt chuan sorkar lam pawhin a test-na tur kha theihtawpin kan lei belh zel ang a.

Hmanniah pawh kan thutkhawmah, ‘engzat nge kan neih.’ ka ti a, ‘sing khat kan nei a, sing khat dang kan chah belh,’ an ti a, ‘sing dang lo chah belh leh rawh u,’ ka’n ti ngawt a. Khatiang khan a tul a nih phawt chuan kan chah belh chho zel ang a, test pawh a tul chinah chuan kan tih zau chhoh zel a thain ka hria a a test pawh kan test tam tawh khawp mai a, amaherawhchu a la tawk zo lo. Kan hrileng a darh dan azir zelin a test pawh kan in test chho zel ang a, khawl a ni emaw, hmanrua a ni emaw, thil dang a tul ang zelin kan hriin min thutchilh dan leh a rawn in spread dan azir zelin hengah chuan sorkar pawhin hma kan la ang, a awm ang ang kan hmang zel ang tih ka han sawi duh a.

Amaherawhchu khatihlai khan theihtawpin sum leh paiah pawh inrenchem thei ang chi a kal bawkin a then hi chu sumdawng emaw, a nih loh leh a then chu mahni mimal thila zin eng eng emawte an lo awm ve thin a, khang kha an kal man emaw, a nih loh leh quarantine-a an awm chhung tumsak zel khan a rei ang reng si a, a case azirin lo ti ula, harsa zual bik an awm chuan a free-in lo ti zel rawh u, harsa zual bik khatianga inpe thei lo chu tumah tihluh loh tur tiin keima mimal pawhin instruction ka pe a. Amaherawhchu, chutih laiin pawisa nei reng eng emaw zat nei tihte kha chu an lo intum ve chin tur kha chu a bi pawh lo thliah mah ula a awm e. Amaherawhchu, mipuiah harsatna lian thleng zawng khawp chuan kal hauh suh u, kan neih ang ang kan hmang zel dawn nia ka ti a ni.

Tichuan, vawiinah hian sawisen loh kan kohhran ah, kan mipuiah, kan NGO-ah, kan thawktuah, kan party-ah, kan MLA-ah sawisen loh lawmthu kan ba a. Vawiina hetiang dinhmun kan dinna hi sorkar mai a ni lo, CM mai a ni lo, Health Minister mai a ni lo, Health Worker-te mai an ni lo, kan vaia kan contribution tak tak a ni tih kan hria a. Chuvangin, vawiinah hian hetiang tichho zel turin mipui zawng zawng, kan NGO, kan kohhran, kan thawktu, kan Legislator-te leh party tin nen theihtawpa tangho a hei aia nasaa kan hripui hian min sawp lohna tura tan la zel turin he kan Dan neih, kan prevention Dan neih pawh hi vawiinah hian han pass phawt ila, tichuan a tul ang zelin tihbelhte a la ngai a nih leh kan tihbelh leh zel ang a. Tichuan, he hripui hian Zoram tibuai lian lovin lo check hram hram dan i zawng tlang ang u tiin ka rawn sawi tel a ni e. Pu Speaker, ka lawm e.

**SPEAKER** : Kan sawihona kan zo ang a. Minister zahawm tak a changtu Dr. R. Lalthangliana kan sawihonaa sawifiah ngai a tihte rawn sawifiah se. Windup turin kan sawm ang a, pass rawn dil nghal turin i sawm ang.

**Dr. R. LALTHANGLIANA** : Pu Speaker, ka beisei aiin sawi kan tam a, ka ngaihtuah a, budget session puitlinga general discussion kan neih kan chai ang deuh khan kan chai ta a. Kan Bill taka hi ‘The Mizoram containment and prevention of Covid-19’ kha a nia, amaherawhchu a huam zau a. Kawng leh lamah chuan hemi Covid kan hmelhriat hnuah he House-ah hian session kan la nei chiah lo a, chuvang chuan a hmasa ber ram pumin kan buaipuite a nih vang pawh a ni ang a, thahnemngaihna a nasain ka hria a. Member zahawm tak takte vawiinah hian he kan sawihonaah kawng dang deuhte pawh kan sawi a, chhan vek chi te, chhan loh chi te pawh a awmin ka ring a.

Kan session hmasa Pu Speaker, February thla tawp leh March thla tir vel kha a ni in ka hria a, a tawp ni chiah kha ka hre lo a. A tawp lamah kha chuan Covid hi Conora Virus tih hming deuh khan a lar tan a. Amaherawhchu khatih hunlai kan session hnuhnung ber khan Pu Speaker, nangma ruahmannate pawh kha a ni a, HIV lamah khan kan han kal deuh a, khalam kha vawiinah chuan a luahlan ta a, tihian kan han kalchho ta a ni a. Kawng lehlamah chuan sawi tur tam tak vawiinah hian kei pawhin ka neih ka ring a, member zahawm tak tak la sawi lote leh sawi mekte pawhin sawi belh tur tam tak in neih ka ring a ni.

A Bill-ah hian han lut lawk ta ila, member zahawm tak Pu Hlana khan a thil sawi pakhat, a Bill leh heta a hmaa kan sem inanlohna a tih kha chu kan ordinance kha wawi khat amend a ni tawh a. Tuna Bill anga kan han sem hi a dik zawk a ni tih tih kha ka khaikhawmna ni se a tha awm e, tikhan min lo pawm sak ta ula.

Tin, tuna kan Bill hi Covid-19 darh lohna tur atana kan ram leh kan society mila kan siam kha a ni a. Chuvang chuan uluk tak chuan kan zirchiang ve a, nichina kan ngaihthlakah han Disaster Management Act, 2005-ah khan SOP a awm lo a ti teh ang. Chuvang chuan Covid a lo awm hi chuan SOP mumal tak hetiang hian kan han siam chho a, SOP hi a hrang hrang hian kan siam teuh mai a ni. A chang chuan Doctor-ho hman tur te, thawktute tan te, Task Force ho tan te, tikhan pakhat kha a hmantawm theih loh a, hnathawktute leh kan chhawrte azirte pawh khan a ni tel a ni tih ka sawi duh a. Mipui hremna ang zawng lutuk khan ngaihtuah lo ta ila. Fimkhur a tul si a, Dan zawm a tul si a. Chu kan Dan zawm a tulna zawnah chuan heng hi tih tur, tih loh tur, hmai tuam tur, inhlat tur tih te, kut sil fai tur tih thil chi hrang hrang kan han tihna kawngah hian Dan kan chelek loh theih lohna lai kha a awm a. A tak takah phei chuan a implement-tu te kha nichina ka sawi ang khan kan force lam kan police-te; tin, a hnuai kha han chhiar ta u la, sorkar piah lamah pawh khan Task Force-te pawh kha kan hmang tangkai viau a ni, Dan kan lekkawhna kawngah te pawh hian tih te kha kan hriat ka duh a, anni pawhin min cooperate tha khawp mai tih te pawh kha ka han tarlang duh a ni.

Hon'ble Chief Minister rawn sawi te pawh kha kan luh hma khan kan pahnihin kan en a, Á va mak ve maw le, helai sentence hi, 'Police officer, not below the rank of Constable' tih lai vel hi, 'below the rank of Constable' tih a awl awm mang e', kan ti a. Amaherawhchu, kha kha kan police officer-te leh kan IGP pawh, law & order kengkawhtu lamte kan han zawh khan, 'kan tihdan phung a ni' an ti tlat mai a, chuvang chuan, hei hi awi phawt mai ila tih ka han tarlang duh bawk a ni.

A tawi zawnga sawite pawh tum ila. Khawl lamah kan lut leh ta daih a vawiin chu. Khawl luh kha member zahawm tak takten an rawn sawi a. In thilphalna kha ropui ka ti a, Opposition Group hruaitu Pu Duhoma pawh khan Health Secretary hnenah a lo sawi a, 'kan fund atang hian lei ila a theih em,' a lo ti a. Theih phei chu a theih a, amaherawhchu tlang deuhin ka sawi ang a, thil dik tak hi kan hriat a tha a. Kan lawm em em a ni, in thilphalna kha. Tin, Thorang bialtu pawh khan a rawn sawi a, amaherawh chu thil pakhat chu, ZMC-a kan laboratory neih a saw, kei pawhin a tira ka han en khan TB laboratory atana siam a ni a, kan zo tep tawh a, 98% vel chu kan zo tawh nain, Chawlhni tlaiah ka va kal a, RTPCR te hi nei ta ila dah theih dan tur kawngte a awm em? ka ti a, Committee kan din a, 'core committee' kan ti mai a, Health Secreatry chairman-na hnuaiah MLA thenkhat Dr. Mathlana, Dr. K. Pachhunga leh Dr. Mawitea te, kan mithiam ZMC leh MZU lama Professor-te, Micro-Biology lama Head te leh RIPAN lama kan mithiam Dr. Hlanmawia te pawh kan han ti a. Kan din a, kan din ni la lain chu committee chu an tlan phei a, 'sawlai saw va en teh u,' ka ti ve ringawt a, an va en ta a. Khalam ti mi na na chuan, 'saw laboratory TB atana tih saw a hman theih mai awm mang e aw,' an ti a. Tlai thim hma khan kei pawhin phone call ka dawng a, 'darkar

2/1 kan han en a, hetah hian PCR khawl daha tih theih dan a awm awm mang e aw' an ti a. Tah chuan ICMR Delhi lama hotu pawimawh tak takte pawh kan professor-te nena an inhmelhriat avangin an zu bia a, kei pawhin ka bia a. Khatih laia kan dinhmun ka han sawi duh chu, completely national lockdown lai a ni a, connectivity engmah a awm lo va, air-in a awm lo va, train-in a awm lo va, by road-in a awm lo va, kahtiang khan kan indang chat vek a ni. Kei pawh kha ka mangang ve khawp mai a, engpawh ni se a nihna takah chuan, kan dah dawn chuan Indian Council of Medical Research-in phalna min pek loh chuan tih theih miah loh kha a ni a. Tahchuan kei pawhin Prof. Balram, Director General, ICMR, India rama lal ber ka zuk phone a, 'Pu Balram, lo kal ngaihna a awm lo, amaherawh chu vawiinah Covid-in min rawn thleng tawh a, hei hi chu min phalsak mai rawh; PCR kan thawhkhawm te pawh a ngai dawn a, leisa nei heklo chu' tiin ka zuk phone a. Ani chuan, 'video-in rawn thawn thla ula, ka lo phalsak ang che u' a ti a, reilote chhung, an en atanga ni 7 chhung khan sawlaih khawl function theih dan tur kawng kha an hmuchhuak ta a. Tichuan, kan han dah a, kan han pawt khawm a, ka hriatsual loh chuan April ni 10-ah kan function tir thei ta a ni.

Chu mai chu a ni lova, April thla tir lama function thei tur anga kan han hriat khan, kan micro-biologists kan mithiam ho kha Covid Test Lab. ah khan pawngpaw thawh tir theih mai kha a lo ni lo va, Assam nena kan inkalpawhna a bul vek tawh si a. Chutih lai chuan, kan doctor-te pahnih leh kan Lab. Technicians te a hnai ber Guwahati ICMR-in hmun an neihnaah khan training pek an ngai a. Assam Health Minister-te pawh loh theih lohin biak an ngai a, anin a lo remti a, tichuan national lockdown lai nichung khan ni 3 training an zuk nei a, helaia khawl engkim an lo peih chiah khan anni kha training chhuakin an lo haw a.

Anni bakah khan buaithlak deuh deuh awm chu Pu Speaker, kan hriat zau pawh a tha a, a thawktu dang, scientist B leh C hlawh tam zet kha lak a ngai ta a, chungte pawh chu MPSC-a tikhual vel kha a theih tawh lo hrim hrim a. Video Conference hmangte pawh khan tikhan kan inla chho nawk nawk a ni. Chuvang chuan sawn bul kan han tan a. Amaherawh chu, hun a lo kal zel a, thil pakhat hriatsual awmin ka ring deuh a. NHM (National Health Mission) in khawl a lei, Thermo-Fisher Company siam kha la thleng lo ang hian whatapps velah a ri a ri a; June ni 30 khan a lo thleng tawh a, July ni 1, kumin khan ICMR-in min pekte pawh kha a ni tel bawk a. A bik takin hei hi Bangalore based company-in quotation an rawn chhang ;, tin, USA lamte nena in tied-up a an zuk chah niin ka hria a, chu chu July ni 1 khan installation kan ti daih tawh a ni. Khawngge a awm tih tih kha whatapps-ah chuan ti tawh lo se ka duh khawp mai.

A dang leha chuan ICMR-in min pek liau liau hi tunah hian kan dah tawh a, tunah hian kan laboratory-ah sawn khawl pathum bak a dah theih loh

a ni. Hon'ble MLA Pu Duhoma te leh Pu Zodintluanga te pawhin in han tih lai kha chuan a lo kal tur khawl kha kan hre lawk tawh a, tlang deuha kan hriat a tha a, in thilphalna kha a ropui a, a lo kal tur kha NHM atangin a ni a, Pu Tluanga, Hauva & Sons kan lo commit tawh a, sawtah sawn kan accommodate ang kan ti a. Chu bakah chuan ICMR atanga min pek tur kha a accommodate nan khan kan lo commit tawh bawk si a; pathum bak dah ngaihna a awm si lova, RTPCR khawl hi hmun dangah han dah dawn ila a buaithlak em em a, in a hranpaa sak a ngai a ni. Tunah pawh Civil Hospital chhung vela han dah pawh kha ICMR chuan an tih ka ring lo va, a chhan chu he virus chak lutuk hi, 'it should be isolated,' a hla thei ang berah a hranpa a in sak tur a ni tih a ni a. Chuvangin, han sa chawp tur kha chuan thla 6 thla 7 bawr vel a lo ngai ang a, manpower ngaih belh chu thu dang ni se. Chuvangin kan hon'ble memberte in thilphalna kha kan hria a, kan lawm tak meuh meuh a, amaherawhchu khalai problem kha a awm a ni.

**Pu ZODINTLUANGA RALTE** : Pu Speaker, keini tih kha chu chhim lam Lunglei, Hnahthial, Lawngtlai, Siaha, kang district ho zawng zawng cover tur kha a ni a, ZMC lam kha kan rilru ah a awm lo va. Tunah thla heti chen hi a awm tawh a, Lab-a dah te kha chu bul kan tan thei tawh lawm ni? Aizawl chauha engkim dah hi a tha lo e, tunah hian Lunglei lamte saw a nihna takah chuan testing tih a la tam lova, eng chen nge hri a darh tawh tih hriat a la ni lo tlat a. Chuvang chuan Lunglei mipui te, chhim lam mipui te tan khawl awm tawh sa reng tan sawn Lab hi a siam thei mai lawm ni? A theihloh pawhin keinin kan lo ti ang e kan ti kha a ni a.

**Dr. R. LALTHANGLIANA, MINISTER** : Ni e, kan lo hria a, Lunglei lam tan a ni tih te pawh kha kan hre tho a, hon'ble MLA khan ka office-ah kan han sawi a, khatih lai khan kan experts te khan Lunglei lamah report an la pe si lo va, an report kan han ngaihthlak khan, a tira kan beisei dan chu, keini pawh tihat hian kan awm ve tho a, khawiah pawh dah theih emaw kan han ti ngawt a, kan Lunglei hospital-a room lian deuhah te khan a dah theih mai lawm ni kan han ti ngawt a, cancer patient awmna adjacent ngheng te a lo ni a, a lo remlo ta zel a. Engpawh ni se kan lawm a, amaherawhchu a dahna lai turah, tunah pheih chuan order kan tichhuak a, Medical Superintendent te leh MLA thenkhatten a hmunhma en turin tunah hian thil an kalpui mek a ni tih kha ka chhanna ni se.

Pu Speaker, khawlah kan lut zo law law ang a. Chief Minister hian khawl leh thildang chungchang hi min hriatthampui em em mai a khatia kan expert team ten Lunglei an va tlawh khan an lo haw lampin thil pakhat Lunglei vang pawh ni lovin Mizoramah district 11 kan awm a, Aizawl chu ZMC thuthmunte a lo ni a. Hemi hi chu tiam lovin Aizawl pawn lama District 10-ah hi chuan Mini PCR TrueNat Quantro kan tih hi, khatih hunlai khan new innovation, thilthar a lo ni a khawvel in an han hmelhriat thar deuh a. Kha kha

an han hre thar ta a, hei hi district 10-ah te hian dah dan kawng ngaituah ila tih kha an rawn rawt a ni. Tichuan kan han chhut ta a, a tha viau mai awm mang e aw kan ti a, ngaihtuahna kan seng ta a. 'Khawi atangin nge kan lei ang'? kan ti a. 'Kan CM hi sawipui ila,' kan ti a, anin i lei ang, district 10 atan lei ila, a ti a.

Tichuan (a tawi zawngin ka sawi ang a) a lo thleng har tih pawh kha a dik tho. Kawng leh lamah chuan by-road in khutah Kolkata mai ni lo, Kolkata piah hla lutuk atangin by-road in an rawn kal a, a buaithlak khawp mai a. Khawl delicate a ni a, tlan bawrh bawrh pui theih loh. Tin, thlawhnaa han tih dawn khan khulalah remchangte a lo awm thei lo va, a rawn kal rei deuh hlek a. Vawiina House-a ka sawi duh chu TrueNat Mini PCR Quantro kha tunah hian district zawng zawngah installation kan peih vek tawh a. Sorkarah report an rawn theh lut tawh bawk a. Sorkarin a lo pawm tawh bawk a. Nizan khan ICMR permission la turin kan thawn thla nghal a. Vawiin chawhnu lamah hi chuan permission kan hmuh theih kan beisei tih kha ka han tarlang duh a ni, a lawmawm em mai. Hei hi vaibelchhe eng zat nge kan sen ka hre lo a. A thatna em em chu he kan khawl hi chuan Covid hi lo reh ta pawh ni se, natna chi hrang hrang 16 dang entirnan HIV te, Malaria te, Dengue tih te, chhul cancer te chi hrang hrang 16 kha a test thei a ni. District-ah chu chu an ti thei vek tawh dawn ta a, chu chu a thatna a ni ta a ni. Tin, a test result hi ICMR-in certification an pek thlap a nih avang khan sample kan barh luh atanga darkar khat chhungin a test result a chhuak thei ta a. Tin, Quantro a nihna ang takin vawi khatah sample 4 an barh lut ang a, darkar khatah a result a chhuak ang a, ZMC-a kan thawh vanglai tak tak tlaivara kan thawh anga kan thawk a nih chuan 100-200 inkar bawr vel sample hi nikhatah kan test thei ang an ti a ni. Chuvang chuan a hlu viau dawnin ka hria a. Tin, thawktu hi a hranpaa lak belh a ngai dawn lo a. Kan MBBS leh Lab. Technician te training rei vak lo kan pe vek tawh a, tunah hian thawk nghal thei turin ruahmanna kan siamfel tawh a ni tih ka sawi duh a.

Hemi chungchangah hian hon'ble Chief Minister-in thil min hriatthiampui em em a, sum min ngaihtuah sak a, a chungah pawh kan lawm em em a ni. Chumi piah lamah chuan vawiinah hian a tak ram a la thleng lo deuh a. Amaherawhchu commitment a nih tawh avang khan a sawi ngam turah ka ngai a, min chhuahchhal leh ang a, a lo thleng har in ti ang tih chu ka hlau deuh a. VRDALAB hi pui tak a ni a hei chu. Pui tak kan ti ang a PCR, RTPCR nen a inang ve lo a. Virology-ah a laboratory lian tham hi ZMC-ah hian Health Ministry hian min rawn pe dawn ta niin kan hria a, kan lawm khawp mai a, hei hi chu a pui khawp ang. Tin, Medical College nei lo tam tak an awm laiin Mizoramah ZMC chuan kan neih theih kan beisei a ni tih ka sawi leh duh a ni, a tangkai khawpin ka ring.

Tin, test man leh ei man chungchang hi Health Department lawng lawng hian kan kut vek a nih chiah lohna lai hi a awm a. Sawihonaah erawh chuan Health lam te pawh an tel bawh a, DM&R te nen pawh sawi a ni a. Amaherawhchu hon'ble Chief Minister sawi ang deuh khan DC-in ei man te leh thlen man ang bawr vel hi chu mihring an dinhmun enfiahin, harsa ngawih ngawih leh tanpui ngai an nih chuan an ei man thin te emaw ang chi kha a ti lo thiam ve viauin kan hria a. Complain pawh hi a awm lutuk lo a. Tin, Mizo tlawmngaihna ang deuha neining fate chuan kei nin kan lo tum ve sak theih te hi Covid-a kan contribution a ni ve mai alawm ti a hrethiam te pawh kha an awm ve bawh a ni tih ka sawi duh a. Tunah hian ei man leh thil dang chungchangah te pawh hian notification fel fai deuh a awm tawh in ka hria a.

Tin, ka han sawi leh duh chu member zahawm tak tak te khan in tarlang a. Entirnan Healthcare Worker kan tih hian doctor atanga Health bika thawk ho an ni a. Tin, Covid-ah hi chuan Health Department Worker ringawt ni lo kha kan tam ta em em a. Kan Task Force te, medical knowledge nei si lo te pawh kha kan vaiin kan tang tlang ta a, YMA member te, V/C te, kohhran pawl te, tute pawh hi kan tang tlang ta a. Tin, chutah chuan kan rawn inpe ve hrim hrim teh ang, volunteer-a ti pawl hi hmun tam takah kan awm a. Ramri duty mai ni lovin khawpuiah te leh thingtlang khaw tinah. Chungho chuan wawiih hian he Covid hi an lo kai palh a nih chuan an senso hi engtingge niang tih ngaihtuahna sorkarin a nei tawh a. Hon'ble Chief Minister remtihna angin kan Task Force te leh Healthcare Worker te, he Covid dona atana vanduai ang chi hi chu kan huam tel dawn nia tiin notification pawh tunah hian kan chhuah thei tawhin ka ring a. Thil dangah kan buai tlang a, kan zin bo a, mahse hei hi harsatna awm lo turah hon'ble Chief Minister remtihna angin kan kalpui thei tur ah kan ngai a. Chuvang chuan a thlamuan thlak hle a ni tih ka sawi duh a ni.

Covid kan do chungchangah hian kei ka lawm em em mai a. MLA zawng zawng, kha lama thu leh helama thu, a tute pawh hian ngaihtuahna kan sengin ka hria a. A tirah chuan lehkha kha ka rawn thawn ve ngawt che u a, 'Mahni bialah in thiam ang angin' ka rawn ti a. In ti tha in ka hria a. MLA fund chu kawng dang a ni a ka hre lo a. Amaherawhchu MLA fund lo lam hawi zawnga tangkai tak tak te pawh kha kan awm tlang a ni. Sum kan sen dan te leh tha leh zung leh ngaihtuahna kan sen dan hi a inang tlang vek thei in ka ring lo a. Amaherawhchu ngaihtuahna in seng, kan seng tlang a ni, ka lawm em em a ni. Chuvang chuan he kan Assembly kaltlang hian, kan rorelna kaltlang hian in zavaia chungah hian Health changtu ka nihna ang pawh hian thinlung takin lawmthu ka sawi duh hrim hrim a. Chumi rual chuan lawmthu tam tak sawi tur a awm a, kan sawi sengin ka ring lo va. Member te mai bakah kan hon'ble Chief Minister, Finance lo chang bawkin harsatna awm miah lovin kan sawi ang hi chu min ngaih pawimawh sak thin a, min tih sak zung zung thin a, a chungah lawmthu kan sawi a.



Tin, MKHC te leh Task Force-a involve kan tih, Joint Co-ordination Committee, YMA-in leading part an han la a. Kan V/C Association te, Local Council Association, Aizawl te leh NGO dang zawng zawng te, heng ho thawh hi a ropui lutuk a, man lo vek, pawisa pe lo vekin (ti mai ang) kan ti-ah ka ngai a, an inpekna hi a rei tawh a. Ni hnih khat, kar hnih khat ni se chuan ka hrethiam a. Kan buaina hi a rei tawh em em mai a. Chumi karah chuan waviinah hian a ropui ka ti a.

Tin, kan sorkar hnathawkte pawh hi ka sawi duh. Kan Chief Secretary pawh hi a hun takah Chief Secretary kan nei a nih hi. Kan Health Secretary pawh a hun takah. DM&R Secretary te pawh a hun takah tih tur khan an ni vek mai hian ka hria a. A hah pawh an hah, zanlai dar 12 te an thleng a. A chang chuan zankhat phei chu keimah ngei pawh dar 3 velah file min sign tir a. Khatiang chang kha a awm a. An hah em em a kan Chief Secretary leh kan official dang zawng zawng. Department tin mai hi kan involve vek mai a ni a, a ropui ka ti a ni.

Tin, henga inpe dang tam tak te hi an awm a ni, an hming kan sawi thei lovang, a ropui ka ti lutuk a. Hetiang reng renga thil pakhata ram mipui kil tin ami te, sorkar hnathawk, eng sector pawha thawk ten kan han thawh khawmna luang khawm hi Mizoram-ah hian a la awm lo in ka ring tlat mai a. A chang chuan Ramriah hian inkap ta ila, hetiang em em hian kan tangrual lo maithei a ni, te ka ti a, Covid chuan min hnuk khawm fai vek mai a, hei hi a ropui lutuk a, Chief Minister zahawm tak sawi ang khan Pathian hnathawh ropui tak a ni tih hi ka sawi duh a ni. Telephone te pawh ram pawn atngin kan dawng nasa a, Mizoram hi in ti tha ber e, an ti a, kan Health Minister Dr, Harsh Vardhan phei chuan vawi tam hian min rawn bia a, ‘congratulation’ a rawn ti thin a, ‘engnge a chhan?’ ka ti a. ‘Thil pahnih khat ka sawi duh, pakhat naah chuan thi in la awm lo ti raw, a dik em?’ ‘aw, dik e.’ ‘Tin, thil dang neuh neuh Task Force in tih hi kan lo zir chiang ta a, tun hnaiah chuan India ram hmun dangah leh khawvel hmun dangah hian hetiang Task Force, kohhran force te nen, NGO force te nena tang tlang ang hi a tih hleitheihin ka ring lo a, in van vannei em!’ min ti ve ngawih ngawih a ni. North Eastern States-ah pawh hian Meghalaya-ah han ti dawn se hnam chi hrang hrang an lo tam si a, Manipur-ah ti se tawng chi hrang hrang an lo tam si a, Nagaland-ah tise a har lutuk. Mizo erawh chu kan society hi homogenous society kan ti mai a, hlawm khatin Pathianin min kaltir a, tawng khat kan hmang a, ringtu kan nihna zawnah inpumkhatna tha lutuk Pathianin ti hian min pe bawk a, heng zawng zawng infawkkhawm hi a ni ka ti a, a lawmawm ka ti a.

Pu Speaker, buaithlak em em chu Covid a hluar tan tirh lai vel te pawh a ni ang a, Pastor Hruaia kha kan nei a, a lo serious khawp mai a, a dam ta a, chutih mek lai chuan khatih hun lai khan ka ngaihtuah ka ngaihtuah thin a, ZMC ah hian test hi kan ti ve reng a ni. A thla tel a ni em aw ka hrelo a, a ni

zat ka hre lo a. Negative hlir kha a ti chhuak a, whatsapp group thenkhatah khan, ‘ZMC hian positive pawh a ti chhuak ve theilo, negative chauh a ti chhuak thei’ an ti a, mahse khatih lai khan Pastor Hruaia, positive kan neih mek a la negative lai khan kan test a ni. A test result kha a positive a ni, mahse kan test reng reng kha khatih lai khan a positive lo vek mai si kha kan han phun deuh nak nak hman a, mahse ram pawn atanga s kan thalai te leh zin veivak sing bi a an han haw tak tak mai chu positive kha a lo ti chhuak zawt zawt thei ta mai a ni. Thil hi a chang chuan rin thil thu leh suangtuahna tam tak nen Covid hi kan kalpui a ni tih kha sawi nan ka han ti mai a ni. Engpawh ni se Pu Speaker, India ramah hian, a lawmawm a, Pathian vang a ni a. 30<sup>th</sup> January khan ka hre reng a, kan hon’ble CM hian a hre tawh lo mai thei a, Central sorkar-in Covid chungchangah hian lo fimkhur deuh teh u, ngaihtuahna lo seng ve deuh teh u a tih khan Covid awmzia pawh kha kan hre vak bik lo a, emergency meeting kan ko pawp pawp a. Tikhan Task Force te din chhoh niin kan CM-in ‘Chief Secretary in khai rawh se,’ tiin state in executive committee dinin tikhan kan han kal chho ta a. Ka lawmna em em thin chu Pu Speaker, India ramah hian Airport screening hi a hmasa ber niin 4<sup>th</sup> Feb khan Airport screening hi India rama Airport zawng zawngah a ti hmasa ber ti kan ni. Tin, pahnihnaah chuan forced border screening titu kan ni, ramri ah luh kan khap nghal a, engemaw palh a awm a nih pawhin screening kan han ti ta baw k a.

Tin, ramri han tih khan kan inter-state inkalpawhna ang chi te pawh huam khan. Tin, lockdown hi ka hriat sual loh chuan, national lockdown India sorkar-in a tih hma khan ni thum emaw khan kan advance a ni. Ka sawi sual lo in ka ring a, March thla tawp lamah khatiang te kha a lo ni leh a ni. Chung neuh neuh kan han tih te pawh kha Pathian in mal a sawm a nih ka ring a, tun kar kalta khan Ministry of Health & Family Welfare khan India ram states leh UT 35 niin ka hria, tah khan a ti tha leh tichhia te a rawn tarlang ta a, tahchuan Mizoram kha ‘best performing state’ ah min rawn puang ta a ni, a lawmawm khawp mai, Tah hian tumah inchhuang tur kan awm lo, chunglam hnathawh a ni tih hi ka mimal rilru ah chuan a Chiang em em a. Kan Chief Minister ho in, ram mipui tute pawh opposition ho zawng zawng nen kan ti a, malsawm tlak a ni. A chhan engnge ni tia ka zuk zawh chuan pakhatnaah chuan, tunah hian hmarchhak state inthenawmah pawh hian Assam-ah 300 dawn an thi tawh a, nuai chuang positive an ni tawh a, Tripura-ah chuti zat an thi, Meghalaya, Assam-ah tih zawng zawng kha an han sawi a. State tereuhte North East-ah hian kan neih ve Sikkim hi a awm a, keini aia tlem zawk. Anni pawh khan nunna pathum emaw an lo hloh ve a, kan ramah erawh chuan nunna hloh kan la awm lo hi kan mark hmuh sanna a ni. Tin, pahnihnaah chuan positive hi a hrim hrimin North East State-ah hian Sikkim te ai pawhin kan la tlem tlat! Vawiin zinglam update ka hrelo a, Sikkim-ah hian sanghni h dawn a ni maithei a, amaherawhchu tunah hian sangkhat leh tlem tak tak, two figure kha kan la niin ka hria a. Chuvang chuan heng zawng zawng hi Pathian

hruaina, awmpuina a ni tih hi ka sawi duh a ni. A tawpa ka sawi duh lai chu he Bill hi kan hmang rei tawh ang reng.

**Pu LALDUHOMA** : Minister zahawm tak hian a rawn sawi lang lo a, insurance, nunna chan lo awm ta sela, hmun dangah chuan nuai 50 tih te kan hria a. Civil mi frontline-a duty te leh Covid kaihna wiha duty, nunna chan tan hian eng nge ruahmanna sorkar hian a siam aw?

**Dr. R. LALTHANGLIANA, MINISTER** : Chulai chu file a kal chho mek a, nichina ka sawi ang khan ngaihtuahna a awm mek a. Tin, nuai 50 han tih theih chi angin a cover kha chu felfai ang reng deuhin a awm sa a, khami piah lam kha kan ngaihtuahnaah chuan a awm a ni. Engpawh ni se hei hi Chiang leh zualin kan inhrilh thei turah ngai ila a tha awm e. Ka sawi duh leh lawk chu Covid hi a buaithlak a ni. Nichina kan ngaihtlak ang khan khawvel sorkar ropui ber pawhin tihngaihna an hre lo a, a tuar na na emaw tih tur an ni a. Tin, thil buaithlak deuh chu Rapid Antigen Test a ni emaw, Rapid Anti Body Test te kha a tir ah khan an han fak thei khawp mai a ICMR khan min rawn pe nghe nghe a, kan han hmang tan a, kan hman hnu lawk ni 4/5-ah, ‘A tih chi loh, rawn return leh ru’ an ti a, tikhan an thil tih hi an thlak an thlak a. Khawvel huap kan WHO pawh hian an hmuh dan hi an thlak thleng zing lutuk a, kan inring hman mang lo a ni, a buaithlak khawp mai. Chuvang chuan harsatna tam tak a awm a, amaherawhchu khang zawng zawng karah khan vawinah hian a thiam bera kan ngaih thleng pawh khan ngaih dan inthlak reng kual reng an nih avang khan heng kan ICMR te pawh kal dan thiam a har em em a ni tih ka sawi duh a ni. Khang zawng zawng karah erawh chuan vawinah hian Pathianin mualpho lovin min siam ka ti lo thei lo va, tunah hian an projection ah chuan India Sorkar Health & Family Welfare Ministry Projection-ah chuan December thla in kai chuan tun ang trend, tun ang speed anga in kal chho a nih chuan 5000 aia tlem lo in nei turah kan ngai a ni an ti a, chu chu vawinah hian kan dinhmun, kan tawn ve theih tur a ni tih hria khan fimkhur takin kan kalpui a ngai ta a. Tunah hian kan mamawh tak em em chu Covid Care Centre kan ti a, triple C kan ti mai a, hei hi a ngai tam a, mi 2500-3000 inkar dah theihna tur tal hi kan ngaihtuah loh chuan 5000-6000 hi positive lo awm ta ang se tih kha accumulative ti mai ila, 2500 bawr vel accommodate theihna tur hi kan zawng a kan buaipui nasa em em a. Heng kawngah hian a bik takin khawi veng vengah emaw te hian kan han zawng a, a hmun tha tura kan ngaih, amaherawhchu Task Force te leh tual chhung lam te hian tlem hian min tih a, ‘A! ti lo thei hram rawh u’ te an han ti a, an thahnemngaihna chu a ni tho mai a, mahse hlauh ah hlauh chin tawh hi kan neih deuh loh chuan. Nizanah pawh recording ka siam a, dam leh tlang khatah, thih leh ruam khatah tih ang kha a thleng em lo a nih pawhin, kha Mizo kan nihna rilru, kan inlainattawna rilru, kan induhsakna tawna rilru, christian rilru pu khan vawinah hian kan vaia kan Task Force te nen pawh ngaih dan chi khata; tin, hon’ble MLA te ngei pawh in bialah khatiang thil kan

ti dawn a nih pawhin hriathiamna thui tak nena kan kal ho pawh a tul dawnin ka hria a, chungte chu vawiiniah hian ka tarlang duh a. Triple C hi kan ngah tawk loh chuan harsatna lian tham kan tawk thut thei a ni. Ni hluai ta ila thil buaithlak deuh kan tawng thei.

Dedicated Hospital bik kan han tih ZMC ni lo ho hi chu a tih tam theih loh, 200 atanga 300 bak seat kan neilo tlat a ni. Chuvang chuan triple C hi a ngai tam a, indoor stadium han thlen nghal mai na tur chi te; tin, in remchang polytechnic a ni emaw, Roman Catholic te pawh hi an fakawm khawp mai a, min pe dawn ta em chu ka hre lo va. Prof. Mawitea bialah te pawh kan han dil a, Thingsulthliah JNV te. Khang zawng zawng han lak khawm khan 2000 chuang han ngah mai kha a har dawn khawp mai a. Tin, hei hi a ni ngawt lo va, senso tam tak kha khan a keng a ni. Amaherawhchu, contingent plan kan han ti a man power ngai tur awm te, khang atana ngai tur awm zawng zawng kha kan hon. Chief Minister hian kan meeting hnukungah khan "rawn ti ula" tiin phalna, remtihna a principle-in min neih sak ta a. A buaithlak zia chu Vairengte ah truck driver leh khatiang kaihnawiha thawk an han tam tum te phei chuan MLA thenkhat te, a bialtu te ngei Pu RS-a te pawh an mangang em em a, kan Minister te pathum an zuk tlan thla a, 'A rang thei ang berin vawiinah' an ti a, 'Lab. Technician paruk a awm loh chuan tihngaihna a awm tawh lo' an ti a. 'Lo la pawp mai rawh u,' kan ti a, rorel hi formality lutuk lova tih chang pawh tam tak a awm a ni tih kha ka rawn sawi belh a ni.

**Pu ZODINTLUANGA RALTE** : Pu Speaker, a sawi lai khan thla 5 kan kal ta a, triple C tuna kan neih hian engzatnge a accommodate theih? Thla 5 chhung chu kan la inpeih lo, kan la inzawng mek tih kha i rawn sawi chauh mai si a, engzat vel nge kan accommodate theih? tun dinhmunah chiah hian.

**Dr. R. LALTHANGLIANA, MINISTER** : A zat chiah chu ka hre lova, ZMC-ah sawnin 250/260 kan thei tawh a, tunah chuan kan buai lo. Amaherawhchu vawi leh khata 2000/3000 tel han accommodate ang chi kha a ni lova, tunah hi chuan harsatna kan tawk lutuk lova. Tin, a tir lama lo tih lawk vak theih pawh hi a ni lo, a chhan chu Covid hian April, May laia kan ralmuan riau lai leh tun thla khat chhung vel hian a spike chho ta vak mai a, khalai te nena ngaihtuahna kan sen te a ngai a, engpawh nise fund a lo tul lo a nih pawhin inring lawk ila tiin contingent plan chu infrastructure leh man power chuan ka nei a ni tih kha kan sawi a ni.

Engpawh nise tunah hian chuan ni 2/1 chhung phei hi chuan positive kan tam lutuk lova, tukin zing dar 7 thleng khan positive zawng zawng hi 1012 niin, discharge hi 589 niin, Active Case kan tih Covid Care Centre-a dah theih ang chi te pawh a ni ang chu 423 kan nei mek a ni.

Pu Speaker, sawi tur tam tak a awmin ka ring a, kan hi thil thar Bill pawh a ni lo va, loh theih lovin May thla tir lam atanga kan lo hman tawh,

hemi kan hman avanga kan ram te pawh a him phahna thil tam tak lo awm tawh ang chi te pawh kha a ni bawk a. Tin, kan sorkar hnathawk te leh eng emaw ang chi te pawh heng ah hian a tel lo deuh e tih te leh kan NGO te pawh a tel lo deuh em tih te pawh hi tihdanglam theih, belh theih vek turah khan ngai ta ila. Vawiin a kan sawiho atang hian thil tha tam tak a chhuak ang tih hi ka beisei a ni. Tichuanin he Bill "The Mizoram (Containment and Prevention of the Spread of Covid-19) Bill, 2020." hi Pu Speaker, he House hian a min pass sak ngei turin tunah hian ka rawn ngen nawn leh a ni. Ka lawm e.

**SPEAKER** : Speaker leh Deputy Speaker-in lawmthu sawi tur kan nei ve a. He hripui tihbaiawm tak hmachhawn dawn khan kan Deputy Speaker zahawm tak nen ram hruaitu kan nihna angin kan MLA te nen sawiho in kan fund te pawh hi i thawh khawm ve ang u hmiang tiin, inthlahrung takin kan han pur ve a ni a. Tichuan, member zahawm tak te, Legislature party-a MLA kan hotute theuh kan han ko khawm a, mi pariat lai kan kal khawm a. Party bil advantage awm miah lovin thinlung thianghlim takin kan sawi khawm a, Deputy Speaker nen hian kan lawm em em a ni. MLA Fund te, hlawh te inpek avangin lawmthu kan sawi bawk a ni.

Aw le, Minister-in a rawn wind up a, pass a rawn dil a, kan buk tawh ang a. "The Mizoram (Containment and Prevention of the Spread of Covid-19) Bill, 2020." hi House-ah in pass remti apaingin 'Remti' ti rawh u le, (Members : Remti) Remti lo kan awm em? Kan awm chuan 'Remti lo' ti ula. Aw le, tunah chuan "The Mizoram (Containment and Prevention of the Spread of Covid-19) Bill, 2020." chu he House hian lungrual takin a pass ta a ni.

**Dr. R. LALTHANGLIANA, MINISTER** : Pu Speaker, ka lawm e.

**SPEAKER** : Vawiina kan Business chu kan zo tawh a, Naktuk 2<sup>nd</sup> September (Nilaini) chawhma dar 10:30-ah kan thukhawm leh dawn nia.

Sitting is adjourned. (2:01 P.M.)